

# इव मि

पद्मरत्न तुलाधर

साहित्यया मूलखा

नेपाल भाषाया निबन्ध पुत्रः

बुलुमि

रवि शाक्य, इखाँ, यल

पद्मरत्न तुलाधर

साहित्यया मूलुखा

सफूया नां:- बुलुमि (नेपाल भाषाया निबन्ध पुत्रः)

सफू च्वमि:- पद्मरत्न तुलाधरः (जन्म १०६२ सिपुह्ली  
ह्लायाकं त्वाः, ये ।)

सफू च्वगु ई:- १०७६-१०८१ या दुने (नेपाल सम्बत)

सफूया हामा:- च्वमि थ.हे

ह्लापागु प्रकाशन:- लूजः प्रकाशन (१०८३ चकंपुह्ली), ये ।

निबन्धगु प्रकाशन:- साहित्यया मूलुखा, बखुंवाहाः, यल ।  
ने सं. ११०० , ५०० गू प्रति

मुद्रक:- रत्न प्रिन्टिङ्ग प्रेस, इखाछे, यल फोन नं. २१८७५ ।

सफूया मू:- न्यातका (५/-)

## पिकाकः पाखें

पासा पद्मरत्न तुलाधरया 'बुलुलि' नेपाल भाषा साहित्य ख्यल्य् छगू ग्यसु लागु निवन्ध सफू खः । ह्लापांगु प्रकाशन फुना-श्व सफू स्वयं मखना, ब्वने मखना च्वंपि विद्यार्थी पासापि व नेपाल भाषा भाषिपिनिगु अनुरोधकथं श्व निक्वगु प्रकाशन मूलुखा पाखें पिथने दया जिपि लय्ता । थथे निक्वगु प्रकाशन या रूप्य् पिथनेत अनुमति बिया दचूगुलि पासा पद्मरत्न तुलाधरजु यात भितुना-नापं याकनं न्हूगु सफू पिथनेत लःह्लाना दी धैगु भलसा दु ।

श्व सफू पिथनेत धेबाया भाला क्वबुयादीह्म मूलुखाया छ्याञ्जे भाजु रोहिणीवहादुर कायस्थ व थासा बांलाकेगु ज्याय् ग्वहालि याना दचू पि रत्न प्रिन्टिङ्ग प्रेसया सकल पासापिन्त मुवा ! जय मां भाय् ।

ने. सं. ११०० श्रावण १

बखुंबाहाः, यल ।

छत्रवहादुर कायस्थ

अध्यक्ष

साहित्यया मूलुखा

## ‘बुलुमि’ या धलः

स्वर्गया अभियान

चुरोटया कुँ

कुमाया घःचा

खवबि

प्रेम

सीगु मत

खबरदार

निपाह्नाय्कं

कुसि

जिन्नः न्हूगु यो

## हलं ज्वलं

निवन्धया दमु ज्वना पत्र पत्रिकाय् दंकायाच्चवंहा पासा  
पच्चरत्नजुया श्व 'बुलुमि' खः । थुकी न्हायात येकीहा पासां स्यत्लाक  
व दुर्गेक फिपु निवन्ध ब्वे हःगु दु । इले ब्यले जूगु घटनां हाना  
श्वयाच्चवंगु सम्बेदनतय्त गुनुहुं न्याना चवंगु बुलुमि बुलुहुं थना हःगु  
दु, थुकथं सफूत्रा नां लो वः । नामे दुथुना तःगु भावुकताया स्वापुर्ति  
कवि जुइत गाक्क हलं ज्वलं पासायाके दु धका नामं हे आस याय्  
बह जुउ । अले सफूया नामं थुखे नं भाय् यागु, जुइ फु-ब्वमिपिनि  
दुनुगले क्वसिना चवंगु भावना व चेतना, बिचाः व कलनायात  
बुलुमिया जति थें म्वाका थना हइ, पिब्वइ ।

श्व थथे हे जुइमा धैगु, इकिधिकि हे मसंगु [Rigid]  
नियमत थौया साहित्य-जगतं पतिना छ्वे धुंकल । बरु अथे भापा-

( ख )

चर्वि, नियमया लाखि चिकाचर्वि लिउने लागु, अले दानाचर्वंगु, कींगु मिखाय् दु, इमित लिफ्याना वनाचर्वंगु यक्वं खने दु । थुलि धासा खः - वेकःपिन्त ह्वाय् तपुकेगु लँपु छपु धासा दनि । वेकःपिसं धया दिइ - थ्व शास्त्रीय (Classical) बस्तु खः । छाय् धासा थौया च्वो-पलाखे थः लिउने लागु चाय्वं हे वेकःपिन्त अठ मेगु छपला लिज्याना परम्पराय् आजु का मवसें हे मगाय् धुंकल । मखुसा थथे धाय्- वेकःपिन्त थन्यागु वाक्यतसें मखुसा छुकि लिधंसा बिउ वइ ? महेकुसें धाय् धासा वेकःपिसं थःद्वंगु व स्यंगु चाय्वं शास्त्रीय जुया वनि । बी निभाःया जति स्वया लूजः येकाचर्वंहा पासां न्हूगु लँपु ज्यात धका अजुगति चाय्मागु हे मदु, छाय् धासा न्हूया अर्थ उगु इले जक 'न्हू' मजुसे न्हून्हूगु पिदंकीगु अर्थे पासाया "जितः न्हूगु यो" धस्वाना च्वंगु दु । अले थ्व फेरकथं न्हूक छिउगु पलाः मखसे दकले ह्वापांगु पलाः जुया बिउगुलि हे 'न्हू' जुउगुली अप्पो महत्व दु ।

निबन्ध गथे व छु धैगु खेँ तःपु व तःगु धापू दय्फु । तर वंत विषयवाहक (subjective) व विषय बाहन (objective) कथं निब्व थले फु । यगु पहगु निबन्ध थजु, उकी क्वसीगु बिचाः व तर्क दय् हे मा, अले स्वापू बल्लाय् मा । धाय्गु खेँ तःधने म्वा । बरू धाय्गु पह स्यल्लाय् मा, स्याच्चुइ मा, क्वातुइ मा । उकी छ्वासु पह खने दत धाय्वं निबन्ध फ्यास्यां च्वनी । ब्रमिपिन्त थःगु बिचाःया लिक्क साले फइ मखु; मेगु भासं च्वमि कुतुं वन धासां नं जिल । विषय बाहक निबन्धे बिचाः व तर्क बह कया उगु विषये च्वमि थःगु धुकू कयनी, ब्वे हइ, गथित कयना बिइ, अले गथः फ्यनेगु लँपु नं कयना बिइ । थ्व फुक्कया बह तर्क जुइ, उकिया लिधंसाय् बिचाः न्ह्यब्वाइ । धात्थे ला ब्वइ जक मखु, ब्वे हे मा, थ्व उगु पहया निबन्धया क्वात्तुगु थासा खः थुकथं छगु हे,

छता हे विषयया जक सवा काकां द्वालुया वे फु, थुकथं ब्वमिपि उगु, पहगु निबन्धे घाय् नं माले यो ।

तर, विषय वाहन निबन्ध थासाय् ध्वाना तःगु मखु, दकले ह्लापां थथे नि धाय् । उकिं थुगु पहगु निबन्धे व हे विषये जक हित् हिला च्वने मागु मदु । व हे छगु विषये थम्ह सिक्क थक्क कुत्तुकुला धया च्वने म्हा । बरू थःगु अनुभव किया थकूगु भावना व कल्पनाय् लुया वःगु खँत कोलाका ब्वमिपिन्त न्ह्याइपुक कने फु, न्यके फु । खला थुकी नं बिचाः व तर्क दया हे च्वनी । अय्सां स्वक बिज नय् धेँ किरिकिरि मिनि मख् । बरू त्वसा घासा माक्क चाक्क तथा बिइ । थुगुली कविया भावना व कल्पना दय्फु, बाखं च्वमिया हनेपह दय्फु, प्याखं च्वमिया संघर्ष लुइ फु, अऊ ला प्याखंया धकि नं दय्फु । थुकथं थ्वया लँपु भराय् ब्या । उकिं थुकी कय्कुना पलाः छी मागु मदु । अले निबन्धया च्वमि विषययात त्वह जक भापीवं गा । छगु विषयया त्वह ज्वना थः धाय् माक्क सकनां थथलि व्वथलि ब्वे हय् फु-उगु-थुगु, अले न्ह्यागु । बरू खः, व स्वाके हय्गु सुका कलां निला तःगु जुइमा । अले थ्व नं खः, स्वाय्गु सुका तःगु रंग बा तःताजि जुइ फु, गथे लाना तःगु सुकां मचां भुतिमालिया ब्वे की, लत्ताइँ तक भुतिमालिया स्वापू हे थुकिया ब्वया च्वनेगु बह खः । घात्थे ला (उकिया) मचासू मदइगु हे क्वात्तुगु निबन्धया ग्यसु खः । गुकथं खँ छुत, गुकथं पूर्वकल, थुकी हे च्वमिया कला सुला च्वनी, नाप्पं चेतना गुकथं दुने दुने स्वाना वःगु दु, थुकी हे च्वमिया धुकूपिक् खने दयाच्चनी ।

बस, थुगु हे भराय् ब्यागु लँपुइ पाता पद्मरत्नजु दं ङागु दु । उकिं वेकःषा कुतः 'चा-मचा' छर्खे नि तय् । बरू थथे नि मग्यासे धाय्-थ्व सफूया गुगुं नं निबन्धं ब्वमिपिन्त आसं थ्याइ मखु ।



(घ)

छाय् धासा थुकी त्वसा घासा गाक्कं दु । दर्शन व बिचाःया पांय्बजि वाकुधी स्याक्क न्ह्ये माली हे मखु । बरू त्वसा घासां त्यानु मचाय्क अन्यागु बजि (पांय्) नं क्वत छ्वया बिइ ।

वेकःया दकले ह्माप्पांगु निवन्ध 'स्वर्गया अभियाने' इच्छा थु धैगु खे क्वसीगु बिचाल वाला छुना दिइगु दु । आशा व विश्वास मनूयाके गुकथं दना वइ धैगु खे मनोविश्लेषणात्मक ढग दु । वेकल मनू सु बा छुया लिसले

“जि नं छह्य मनू- इच्छाया छगः मकारि”

छरुवलं धया दिइगुली मनूया स्वभाव दु, अले धाय्गुली कविया पह दु । वेकःया स्वर्ग पाखे पलाः न्ह्याकेगु इच्छां आशा व विश्वासयात थना हःगुली मनोवैज्ञानिक लिधसा दु । च्या स्वीबा याय् थें तर्क थातु थाना लुइका हःगु 'रकेट' नं मिला मय्जुयाथाय् तक हे जक थ्यंका बिइफु, स्वर्गे मखु । ऊर्कि वेकःया आशा व विश्वासं ह्मा-तुति तोतलं नं वेकःयात कस्सिक इच्छां ज्वना तल । अले वेकलं

“जिगु इच्छायात आशा व विश्वासं तोती थें च्वन । तर अय् नं इच्छां जितः मतोतू, जि नं इच्छायात मतोतानि ।”

खवखना सब्बं ब्वे हःगु तर्क ब्वमिपिन्त साला कल्पनायाथाय् थ्यंका बिइ । वेकःया भास कल्पना मगा-मचालं थना हैगु मनं ज्याइगु लद्धु जक खः धाय् न्ह्यो समाजया फाकु सवा मनोवैज्ञानिक पहलं ब्वे हःगु हिसि दु । अले 'इच्छां मनूया ग्वाली नं पपु छुका बिइ, धैगु धापू वेकलं कल्पनाया पपू न्येकया स्वर्ग पाखे ब्वया वनेगु कुतलं क्यना दिल । कात्सनिक रकेतं वेकः स्वर्ग थ्यंकाः छाल । थुथाय् लाक कविं थें थःगु भावनां पृथिवीमांयाके लय्ता खंका च्वंगुलिं पासा पद्मरत्नजुयाके नं कवि जुइत गाक्क भावना व भावुकता दु धैगु बयं । वेकलं खंगु स्वर्गया बखान स्वर्ग क्यना जय्मां क्वाइपिं व छाता दाइ पिनिगु म्हुतुं कज्वइ

ति हे न्ह्याइपु । अन वय् त्वनेया धन्दां चिकाच्चने म्वा । थुकथं स्वर्गयात च्वछाछां पशु जीवन लिसे अनया जीवन लना बस्वाय् हःगु यइपुसे च्वंगु प्याखं ध्याचू (नाटकीय ब्यंग) धाय्मा । अनयाह्य द्योयागु तानाशाही पलाः थः मनू च्या बियागु हुनि मयया वःगु खें स्वाका स्वर्ग नरक थें तागु कयना दिइगु हिंसि दु । अले द्योयात सिले छुना थः ज्यो बा च्यो जुइपिन्त स्वर्ग साप तःधने फु, तर थःगु स्वतन्त्र अस्तित्वया बिचाः तइपि मनूते निति नरक खः धका ध्याचू बिया दिइगुली मानव मनया कुं कुलामे सुनाच्चंगु सत्यता दु । म्वाम्वाकं हे स्वर्ग स्वया त्यहाँ काह्य पासां निबन्ध पूर्वकेगु त्वहलं सी धुंका नं स्वर्ग वने मयेका क्यंगु, स्वर्गया निति पृथिवी नरक याइपिन्त ग्यसु लागु ध्याचू खः—स्यले दिइगु, नुगले कःति थें किइ फुगु । थुकथं हिंसि लाक्क निबन्ध फू चाय्का दिइगु दु । कल्पनाया किचले सुला यथार्थ खें ब्वे ह्या दिइगु वेकःया खुबि खः । कलाया बांलागु धकि खः । थुकी पासा पद्मरत्नजुयात सफलतां कय्पुया तःगु दु ।

निपुगु 'चुरोटया कु' निबन्धे कुँइ नं जीवन दर्शन खंका काय् फुगु वेकःया मिखा खने दइ । पासाया म्हुतुं प्यहाँ वःगु कु मयो मयो तना बंगुलि नुगले तिवक मिका ब्यूगु न्ह्याइपुसे च्वं । अले

“थय्क स्वे बले चुरोटया कु थःगु अस्तित्व मतंकेत सुं ताप ल्वाना च्वं थें च्वं ।”

थुकथं जीवन संघर्षयात कुला जीवनया अर्थ ब्वे हःगु बांला जू । प्रकृतिया नियम ब्वे हहं वेद व उपनिषदं कयनीगु स्वर्ग व नरक, धर्मात्मा व पापीया खं न्ह्यथना 'फै खवा वःपिन्त' (स्याय् फइ थें च्वंपिन्त) स्याइपिन्त धर्मात्मा धाय् गुला धका तय्हुगु तर्क बुद्ध ति हे पुलां जुयां नं उकी न्हूधा दु । ख नं ला

“थः भिसा जगत भि घाइपिनिगु संसारय् अले गोह्य हे धर्मात्मा दइ ? अय्सा सिक्क नरक वनोपि ?”

(च)

श्व तर्क स्यल्लागु ब्यंग दु । ख नं सुं हे स्वर्ग बना लिहाँ वःपि  
मदुनि, नरक हे नं सुनां न खंगु मखु । उर्कि थुथाय् नं कुँया बह कया  
बुद्धया शून्यवादया लिक्क च्वमि दळागु दु । वेक यात कुं

“मनू सित कि स्वर्ग व नरक मखु शून्ये विजोन जुया वनी !”  
ध्वाथुइका ब्यूगुनी अजुगति मुला च्वंगु दु, नाप्पं सत्य पाचिना तःगु  
दु ।

खः, मनूतय् युग युग तक म्वाय् यो । तर म्वाता च्वनेगु इच्छा  
धानां तुं सिना वनेमा । थुकथं मनूया छर्ची काल बा मृत्युया न्ह्योने  
क्वमछुकुसे मगा । तर वेकया आशावादी तर्क क्वात्तुक धया च्वन—  
मनूतय् ता म्वाय्गु इच्छां छनु काल व मृत्युयात नं त्याका काय् फइ  
तिनि । अले सी न्ह्यो मसीत फक्व संघर्ष याय्गु सल्लाह कुँया पाखें  
काय् फुगु च्वामुगु चेतनाया दसु खः, भावनाया तेलान्गु मिखा खः ।

ईयात दिना बिइगु मल्लाह बिना लिक्कथं पनाः छीपि कवि  
लेखकतय् न लिक्कथं नका तःगु ल्वाप्पा न्ह्याइपुसे च्वं । थुगू निबन्ध  
नं बांला जू । बरू छना खँ, थुकी छगू ‘पारा’ दकले लीगायागु धासा  
लेखक मासां म्वासां तने हःगु थें खके फु । तर अन्यापि आलोचक-  
तय् नं

“मनूतसें पित्यासां फुधंसां त्वनीगु चुरोटया कुँइ न्ह्याम्हेसिन  
न्ह्यागु खंसां जि उकी मानवताया न्ह्याय्कं खना च्वना, ...अले श्व  
नं लुमना वो, छन्हू सी मासां म्वाय्त संघर्ष याय्गु जिगु धर्म खः ।”  
थें न्यागु पूर्वका तःगु फ्वलं लोभ चाय्का बिइ फु ।

स्वपुगु ‘कुमाया घःचा’ निबन्धे सी मागु जीवन ज्वना वःह्य  
मनू व स्यनीगु, भ्वाय जुइगु सृष्टियात ध्याचू दु । थुकी बाखंया  
हनापह दुने मुला च्वमि थः धाय्माक्व खँ ब्वेहःगु दु ।

(छ)

“चां पिहां वःगु अन्न नया नं चा छुं मखु धाइपिनि मिखाय् न्होने चा छुं खत । अले कुमा चःति हुहुं मफु मफु ह्लिल ।”

थुकथं बाखं छुना

“याकःचा कुमा ज्याया ज्याला दया नं उगु थासय् लुमवं मिखां त्वलं स्वयाच्चन ।”

अले थःगु कला ता म्वाकेत कुमालं थलबल उत । अऊ नं तज्याइ तितिगु हे जुयाच्चन । तज्यात । अले उकिं तिवक मिका कया दिइगु खं दुने गनं द्या च्वंगु चेतनायात ग्वला बिज, मजीन कुतः याइह्य मनू छःहु सी मानि । निबन्ध चि हाकःमां थुकिं बिइगु हपा क्वातु, थः सीमानिम्ह यागु जूपां थःगु कला (मृष्टि) अमर जुइकेत स्वइगु मिखां नुगः--मकः ग्वला बिउ । च्वेयागु निबन्ध स्वया थुगु भचा पयासु धाइपिन्त च्वाक्क बिइगु लिसः मदु । उलि बांलागु बत्लागु तर्क साला यंकेफुहा पासा पद्यरत्नजुं हथासं च्वया ध्वाक्क दिका दिउगु बांलाक सी दु । तर थुकिं कुल। बिइगु खं नुगले थुं जिंका बिउ । थुलि हे खे बांला धासां न्हू पहगु धाय् थाकु ।

प्यपुगु ‘खबि’ निबन्ध मानव मनया स्वभावयात बांलाक वाला काय् फुगुली सफलता दु । ह्लिलेयोपि मनूत खबिइ लाल कच्चने मागु खं ब्वे हःगु हिसि ला । थुकी च्वमि थः हे खबि फूवागु दु । फू चाय्के न्ह्यो निकोलं

“उकिं थन मनूतय् खबि हुइगु छुं उपाय मदु । बरु खबि हे मानव उत्पत्तिया कारण जुया सदां दना च्वनी ।”

थथे मधागु जूसा आलोचकतसें लिक्थं पलाः छित धायत नं लिफः स्वइ मखु जुइ । थुगु निबन्ध नं वेकः पासायात त्याकबा थ्यंक बिइ मफुत । खला वेकलं

‘उकिं खबि दुखया छुमां खः अथवा दुखया इलय् मनूतय् हृदयया प्रतिनिधित्व याइहा छहा दूत खः ।”

(ज)

थे न्यागु कोलं खबबियात ह्यसीका बिया दिइगु दु । अय्सां पुलां पहलं लिक्थं साला यंकेत कुतः यानाचवंगु खने दु ।

म्यापुगु 'प्रेम' पौया ते हना तःगु निबन्ध खः । ह्याया प्याय्चा लंकेया निरति जुइगु (याइगु) स्वया नुगलं नुगःयात याइगु मतिनाया मू दु धैगु मतिना-ह्माय्कं कयना तःगु क्वातु, नाप्पं स्यत्ला । उकि हे थुगु निबन्धया मू दु । ख नं वेकःया दुनुगलं याइगु प्रेम थन्यागु हे खः । उकि

“हानं थ्व नं लुमंके बह जू कि प्रेम घयागु याय्गु मखु, जुइगु खः ।”

सः थुकथं थ्वल । थम्हं मतिना याना नं बाया च्वने माह्यसित थुइके त्वहलं व्याहा व्यक्तिगत मखु, बरू सामाजिक खः धका मार्क्स-वादी फ्रायडवादी जुया लेखक दंवःगुयात ह्य बांला धाय् फइ मखु ।

अले स्वापू (Context) ततं हिटलर व बुद्धयात तलाजुइ लना तःगुली मानवता सुलाचवंगु दु । नाप्पं नुगलं नुगःयात त्याका काय् फइगुली हे क्वातुपह दु; बलं त्याका कयापिके लासा त्वाकले तया चनकेगु भावना सुला च्वने यो, मनं त्याकापि थःलिसें प्यपुं वइ, थःहे जुया वनी धैगु तर्क हित्तु मतु हिइका तःगुली वकिलया थें न्यागु क्वातुपह दु ।

थुकथं हे खँचवः हीका देश-प्रेम पाखें थःयोम्हेसिगु मन धेचुइका काय्गु कुतः राष्ट्रिय धाय् लो । कीसं आककाके फय् मागु कचिभःयात नुगले दुथुना

“अथे ला थौं कन्हे अन्तर राष्ट्रिय जगतय् सहअस्तित्वया भावनां धाय् धुंकुगु दु । अथेसां बत्ला त्या याय्गु साम्राज्यवादी नीति नं न्हना मवनि । ....”

थथे धाधां गुगुं नं देशं क्वतयः वइगु इले देशया हि जायाचवंह्य छह्य

(ऊ)

मनुखं थःयोह्य छह्य हे जक घय्पुना चवनी मखु जुइ, अन्यागु इले जक छगु लुमन्ति दुपिना चवनी धका मतिनाया भलसा ब्यगुली नं क्वसीगु देश-प्रेम दु । अले बाय् मालीगु खँ नुगः पिस्से च्वंगु भावना न्ह्योने तया

“मृत्यु मन्त स्वया थौं तक बल्लाना च्वगु दु । उकि भीसं वयात बुकेगु खँ सत्तो मज्जनि ।”

जि सित धासा मेहलिसे जीवन अवश्य हँ, धका साउति बिया निबन्ध पूवका तःगु दु । देकः पासा पाचुके दुगु नेवा समाजयाह्य जूगुलि साहम हे याना धया दिइगु खः धका आलोचकतसें मधाय् न फु; तर सामाजिक अधिकार दयां नं ‘पाचुके’ थौंया समाजे साहस हे खः नि ।

पासा पद्मरत्नजुया थुगु निबन्ध ग्यसु ला । तर्क क्वातु । छगूया मेगु पारालिसे क्वातुगु स्वापू दु । धाय्मागु खँ स्याचुक धाय्फुगु दु । थुकथं श्व नं सफल निबन्धमा छेले ला वः; सफलतां कःघाना तःगु दु ।

खुपुगु ‘सीगु मत’ खिउँया प्वाथं बलंका हःगु स्वाभाविक जू । अल्ला खिउँया प्वाथे काकःचां थें वाला उगुं थुगुं खँ लुइका काय्फुह्य च्वमिया निंति गपाय्धं धाय् थाकु । शून्य वादयो प्रवर्तक बुद्धया स्वना नं वेकःया शून्य गा वं, अजुगति चायापु । वेकःया तर्क शून्ययात नं निषयाय्गु कुतः यागु दु । चेतन मनयात थय्क गबला

“घातथे शून्य घयाग् दुगु हे खःसां खनीह्य दत कि ला व थाय् शून्य मखुत ।”

शून्य नं वेकःया निंति शंकाया बिषय जुइका दिइगुली तर्कया क्वातुगु गथि दु ।

(अ)

मत सीवं शून्य जूगु ववथाया अनुभव ब्वे ह.गु हिसि दु ।  
 वयासिवे शून्य लायागु मिखां स्वइपिन्त जक खः, नुगः मिखा  
 चापिन्त मख, थुकथं बिउगु तर्क तिक्क मिका बिउ । गन थःत खंका  
 बीगु ह्वाय्कं नं वेकलं मखन । अले करं नं शून्य (शब्द) धाय् हे  
 माल । अःपुगु लँपु ज्वना च्वइगि प्याखं च्वमिया थें न्यागु वे चागु  
 नुगः (असाधारण मन) ब्वे हया दिइगु दु । उकिया हे भलसाय्  
 ह्वाय्कं चुंदल । यगु थजु, निवन्धे जुइका केनेमागु मदुगुलिं मलो मजू ।  
 वेकःया (लुमन्ति खंगु) नकिने यगाना च्वंगु क्पिपा अले सभ्य धाय्केत  
 पुनेगु वसः नं ज्याय् मवःगु खँ समाजया वैथं गःगु न्ह्यपुइ छत्र सो सो  
 याय्त स्वःगुली कविता थें न्यागु क्वात्तुगु भाय् दु ।

अले मनूया जीवन च्वसि कःका चब्बूगु खँ

“थथे हे सी मजिया म्वाना च्वंपि नं जि खना । म्वाय्  
 मफया सिना वंपि नं जि खना च्वनागु दु ।”

थुकथं नुगले किइ फुगु बाक्यतसे स्वचाके हःगु बांला नू । जाति भेद  
 व वर्ण भेद थें न्यागु युगयात मत्वे धुंकुगु खें वेकःया नुगलं विद्रोहया  
 छुमां हंका हःगु कलां बिलि बिलि जा । लुमन्ति खिउँथाय् दना वइगु  
 चेतनायात कुले न्ह्यो

“हिटलरं लखं लख मनूत स्यास्यां व हुना वन । बुद्धं  
 मारमा प्रहार फफं त्याका वन ।”

मनूयाके दुपिना च्वंगु बुद्ध भावनायात कविताया चिन्तां थें ग्वला  
 बिइ फुगुयात बांला मधासे मगा ।

अनिकालं मनूयात नयाच्चंबले कोटि होम याजुइपिन्त स्यानां  
 नं आया धाय् मल्लिक प्याकुति न्याना तःगु दु । अले मतया अर्थ मनू-  
 या लाया नांगागु मिखाय् जुके हया तःगु प्रतीकवादया न्ह्यथबा खः,

(८)

शब्दे व्यंजना व लाक्षणिक नं खः । थुकिं प्याखं साहित्य व कविताय्  
वइगु थ्वःसः (ध्वनि) यात नं कुला बिउ । वर्ण भेद व जाति भेद  
थें जागु क्वह्यंगु व क्वपुंगु जक खंका बिइगु (खंकीगु) मत, गुकिं  
याना छखलः मेगु छपुचःचां त्यत्तु त्येकाचवने माल, उकियात

“मखु, मनूतय् उगु मत स्याय्गु इच्छा मडुसा थुकी शका मडु,  
छन्हु व मतं विश्वयात न छ्वेकी तिनी ।”

थुकथं मुलु च्वकां थें क्त्र भिका क्रान्तियात भाय् याना क्यना निबन्ध  
पूर्वका तःगु दु । थ्व निबन्ध सारि बांला जू । थुकी तर्कया धोत  
खने मदय्क न्ह्याना च्वंगु दु । थगु निबन्धया च्वमियाके चेतना जुरू  
जारु दना च्वंगु दु । थुकिया चेतनां घना च्वंगु चेतनायात नं ग्वला  
न्वेका बिइगु ज्या यागु दु । अवश्य थन्यागु निबन्धं पासा पद्यरत्नजु-  
यात त्याकबाया स्वांमा क्वखाय्किइ ।

न्हेपुगु ‘खबदार’ निबन्ध रूस, बृटेन व अमेरिकाया निशस्त्री-  
करणया ऊघल्या खं लेखकया नुगले बापा जूगुया किपा दु — न्ह्यलं  
चागु । थ्व फुक्क हे कल्पनाया ख्यल धया दिइगु दु ।

थुकी बैज्ञानिकते ख्वःगु नुगःयात उला क्यना तःगु बांला जू ।  
ख नं बिज्ञान नी जू । बिज्ञानयात मखु, उकिं पिदंकूगु बमत मखुथाय्  
छ्यलीपि नेतात मानवताया शत्रु धका तुयुजः ति हे यच्चुक न्ह्योने  
ब्वे हःगु दु, गुकिं अन्यापिनि लोंख्या तय्गु न्ह्यप्पुइ नं छलिचां यला  
बिउ । च्वमि ध्वदुक नाप लाम्ह बिज्ञानया पाखें दोषी मखु धैगु खं  
क्यने हःगु बांला । निशस्त्रीकरण सम्मेलन असफल जूगु खं न्यनेवं  
(पिज्वःगु) बिज्ञानया ख्वबि ऊसुकालं ब्वमिपिनि नुगले यला  
भछ्याय् याना तःगु हिसि दु ।

कल्पनाया लैपुं वेकः गुप्त क्वथाय् थ्यनी । ग्यानापु (dan-  
ger) या छुमानं बना वनी । चाइ बले वेकलं खनी रकेटं मन्



(३)

लह्याया च्वंगु । थुकथं म्वाय्गु हक इमि हे जक ला धका रस व भमे-  
रिकायाके न्यना च्वंगु न्ह्यसः दु । हता स्वे कत मयया नं छपे-छप्वा  
या निति ल्वा जुया च्वपिनि तुगः—किपा थुकी दु, बुद्धया सन्देश जा ।

खँपु बांला, बिचाः ग्यमु ला । तर निबन्ध हनेगु पहले मेगुली  
थें बांलागु कला तोफित, थुकी पासा आवेशे ङागु खने दु ।

च्यापुगु 'निपा ह्याय्क' भविष्यया निच्वः खः । ज्ञान व शक्ति  
बह कया स्वेबले मनू ब्रम्हाण्ड स्वया नं तःधं । थुगु पहल तर्क न्ह्याना  
वन । श्वन म्हंस (कल्पना) या खयले चाहिना च्वंगु निबन्ध खः ।  
छखे विज्ञानया उन्नति (ध्वंस), मेखे मभ्यता (कला-संस्कृति जागु  
मन) दु । 'खबरदार' लिसे श्वया बांलागु स्वापू दु । थुकथं छगू  
म्हंसं ख्याइ, संसार धूधू जुगु क्यनी । अले मेगु म्हंसं मनुखं कल्पनां  
ज्याना तःगु स्वर्ग न पृथिवी धका ह्याय् च्वाय् याय् मफइ कथं  
सुख लेँ लेँ पूगु क्यनी । निपा लहातय् यगु ल्यधका निपा ह्याय्क  
तया बिया दिइगु दु । अले बिज्ञान (बन ?) मखु छ्यलीय्न्ति

“बैज्ञानिक तय्सं ला मानवताया भलाइया निति न्हून्गु खे  
सीका न्हून्गु आदिष्कार याइ । साहित्यकारतय्सं नं मनूतय्  
श्व ज्या भिं व ज्या मभिं धका मानवताया रक्षाया नितिं लँपु हे  
जक क्यना बिइ ।”

थथे न्वान्वां निबन्ध क्वचागु दु । थुगु निबन्धे नं कलाघा लसां म्ह  
मजू । थुकी तर्क स्वया नं बाखं थें हना धाय् माक्व धाय् फुगु दु ।  
च्वेयागु 'खबरदार' नं थुकी स्वाका छपु हे यागु जसा अक मेगु  
बांलाइगु जुइ ।

गुपुगु 'कुसि' निबन्धे कुसि स्याय् धुंका अपराधिया चेतन मनं  
थःके हे हुने वाला च्वंगु बांला जू । थुकी तर्कया क्वातुगु भलसा दु ।

( ६ )

सीधुं कूह कुसि न्ह्योने तया जीवन - संघर्ष थुइकेगु कुतः अजुगति  
चाइपुक बांला । सीधुं कूह कुसिया म्वाय्गु इच्छा लीसे थःगु म्वाय्गु  
इच्छा लना तःगुली तर्क यइपुसे च्व । म्वाय्गु निति मनुखं याइगु,  
'कुज्या' ब्वया ववपुंगु बुद्धियात म्वाय् चुइकूगु हिसिदु, बांलागु ध्याचू  
खः । अले ऊपल्याम्ह न्यायाधिषं थें न्ह्याव्व चिधिकःसां कुसि न्याइगु  
घटना खिचायात जक लो धया दिइगुली तर्कया घःकू न्ह्याइपुक  
पवानातःगु दु । ख न सलं सः द्रलं द्रः कुसि लहिना तय् लोम्ह  
खिचा हे जक । उकि चेतनायात कुला बिइम्ह वेकलं

“ जितः ला कुसि न्याइगु घटना छगू तःधंगु उपहास खः ।  
कुसि जितः न्याना हि जक त्वंगु मखु, जीवन प्रति जिगु धारणा व  
प्रेमयात नं चुनौति बिल । ”

थये धाय् लो जू । नाप्प सचेतम्ह न्यायाधीषं (अपराधीं) थें तर्क  
यागु दु । थुकयं तर्कया बलं कुसि स्याय् हे बहम्ह धका ( स्याय्-  
धुंका ) कोछिना दिइ । क्षमा मपवंगु थें न्यागु ग्वा ग्वा तर्क नं  
वेकलं न्ह्यथना दिइ ।

न्ह्यागु थजु, थम्हं स्यानाम्ह कुसि पाखें नं

“ म्वाय्त याय्गु संघर्षय् सीत ग्याय् मज्यू, । श्व हे सिद्धान्त  
ज्वना कुसिं जितः न्यात, थः म्वाय्त । ”

जीवनया संघर्षे हपा कया दिइगु निबन्ध कलाया दसु खः ।

अथे हे थःगुद्वं क्यना निपां चूपि पास्याय् मत्योपि धुंतय्त

“ थःगु बुद्धि व ज्ञान अले शक्ति व ताकतया चमत्कारं स्वाना  
श्वंम्ह कुसियात स्याना क्यना च्वना, सी तयंम्हसित म्वाका मखु । ”

कुगाक्क ध्याचू बिया दिल । कुसिया अपराध क्यना कुसि स्वया नं  
निर्दोष फै, दुगु द्योयाथाय् स्याइपित पत्तिचां सुया लिचिला दिइगु-

(६)

ली ताउत लिथ्वइगु, ब्यंग दु । अले थःत स्याय्, फुम्हेनित न्याना  
म्वाय्, मागु जीवन हने माय्क वैत नसा न्ह्यचीका मब्यूम्ह प्रकृतिया  
छ्यने दोषया कु दिके यंकूगु, तर्कं ब्वमिपिन्त पलख ज्यो याना बिइ  
फु । थुकथं स्याय्, माम्ह हे जुया स्याना बा सी माम्ह हे जुया सित  
धया छ्वया नं कुसिलिसे बुना च्वंगु, छुमां हिसि दु । थुकि बल व  
शक्ति मखु मनं त्याके फय्के मा धका (सीगु मते थें) बलया ध्यो-  
धक्का तथा जुइपिन्त मुलुं थें चेतनायात कुला ब्यू । तर्कया निला तःगु  
मुकां स्वाना तःगु निबन्ध कला बांला । उगुं थुगुं स्वाय्, हयां नं  
स्वापू सिइ मदय्के फइगु हे निबन्ध कलाय्, क्वातुपह खः । थुकी नं  
'मीगु मते' थें हे चेतनायात खेचाय्का त गु दु । थ्व निबन्धया  
सफलतां पासायात पाच्यूगु दु ।

जित न्हूगु यो' निबन्धे न्हूया अर्थ न्हू हे जुइक छ्याना तःगु  
दु । उकि वेकःया निति न्हू व ख, गुकि न्हूगु मेगु छुं पिदंके फइ ।  
अले न्हूया अर्थ व इले न्हूगु दः नःनि जक मखु । बरु न्हूगुयात  
तिबः बिइगु हे न्हू । ख, वेकजं येगी न्हू कन्हे पुलां जुइफु । तर  
उकि न्हूधायात भलसा बिइ थुकथं ध्वगिना प्याता प्यातां वने धुंकुगु  
सतिदेविया म्ह थें छकोया न्हू सदांया न्हू धका पाच्छाया जुइपिन्त  
नं यलेगु ज्या थुकी जूगु दु । उकि जुइ निबन्ध छु छुं

“जितः ला छम्ह मिसा पुलां जूसां न्हूम्ह मचा दुइकीम्ह न्हूम्ह  
मां यो ।”

थथे धया दिइगु । अले वेकःया येकीगु पह भाबुकतःया भ्वंचाय्,  
कय् कुना मच्चं । वेकलं नुगलं येका मदित (गुक्रिया दसु प्रेमं' नि-  
बन्धे नं दु) । उकि वेकःया बिचालं वाय्का येकूगु छुं मयेत नं  
न्ह्यइपुइ हे च्वलः वने मानि, उलि क्वातु ।

(ण)

‘अले न्हू दें खनु याइगु म्हणुजाया अर्थ थ्व नं खय्फु कि न्हूगु दें बीगु प्रेरणायात ग्रहण याय् फय्केत मनूतय् आत्मायात म्हं नं ग्वाहालि बी फय् मा ।”

वेकःया धापू कथं ह्यूपाले (परिवर्तनया केन्द्रे) थःत स्वाका चर्चात मनूतय्त सी—स्वाइया सुखू धन्दां कय्च्याइ मय्यु । उकिं जुइ ।

“सी न्व स्वाय्गु धयागु जीवनया समस्या जुइ फु ।”

तर मनूयात अन्यागु खेँ यगाना चवने मला । अथे धका न्ह्योने वःगु, समस्या (प्राःया) निति न्ह्यागुं याय्गु नं वैन मरो । थुकथं मनू-यात मानवता पाखे फस्वकेगु कुतः लिपा मचा जीवन यात न्ह्यथना

‘मांया मुलय् जक व लासाय् जक ग्वारातुला इने मागु जीव न्ह्याक्व हे सुखमय् जूसां जिगु नितिं पुलां जुल ।”

थथे धागु छो नं लो हे जू । ख ला कपा चूसां ल्यहाँ मवइगु अर्थ नं जुइफु । तर संघर्षयात न्ह्यव्वया

“उकिं थौं जितः थ्व हे जीवन यो ।”

पाकःगु सुख स्वया संघर्षया जीवन हे यो धैगु कबूल यागु हपालं मेगु अर्थ पिज्वेकू । अले मनूया सृष्टि लिउ पिदंगु खयां नं ब्रम्हचर्य सिद्धान्त तुलां जुइगु स्वभाविक जुउ । जीवनयात अक् म्वाकातय्गु कुतः लिस्से ‘छुकिया निति’ धया व्वे ह्मःगु न्ह्यसः मनूया सासः ति हे कका । अले सांगाय् ससि थें ल्यलयं

‘जिगु जीवन जिगु नितिं मखु, देशया नितिं खः । अय्सा संसारं जितः म्वाका तय्मा, जि संसारया नितिं म्वाना चवने मा ।”

लुया वःगु लिसः नं उलि हे लुमु । अक् ला राष्ट्रियकरणया क्वा बिइत नं गा अले ज्याथ जुइ तितिगु खेँ छुना

“जितः न्हूगु योगुलिं हे जि बुढा जुइ तिति ।”

(त)

न्याथने हःगु गथि स्वत्तिइ जुउ । नाप्पं न्यूयात येकु येकुं जुइगु,  
ज्याथसू (वृद्धत्व) खना थारा मन्हू, लिचिला मदी । तर अय्त्तं काल  
बा मृत्युं त्याका फांय् फुइं याइ । अय्त्तां

‘तर जिं थ्व मानग् याय् मखु कि जितः काल व मृत्यु  
स्याना बिल । जि ला न्हू येकु येकुं छपला न्ह्याज्यानागु जकं खः ।’

वेकःया हारय् मचाय्गु बानीं वेकःयाके क्वातुपह कयं ।

थुकथं थ्व निबन्धे नं पासायात सफलतां चुप्पा नःगु दु । थुकि  
या तर्क बल्ला, चेतना न्ह्यलं चा, परम्परायात चफ्फुइ फुगु दु ।

बुलुमि वेकःया ह्नाप्पांगु पुचः खः । अथेसां च्वसा गाक्कं ज्यले  
छुकुपह थुकि कयं । न्हू च्वमि जुइवं वँके छ्वासु पह सुला च्वनेमा  
धैगु बिचाःयात थ्व बुलुमि चफ्फु । छपुचले लनावं यँके बले छपु  
स्वया मेगु भचा क्वहाँ वनीगु स्वभाव खः । ठीगु ल्यइगु मिस्त्राय्  
हे थ्व मतोविज्ञान चि थाना च्वंगु मदइ धाय् फइ मखु । छपु निपु  
अन्यागु यात तोता मेगु फुक्कं ग्यसु ला । ह्नाप्पांगु पुचल थःगु  
‘किन्नाग्यसु’ (योग्यता) थुलि क्वातुक बिया दिइम्ह पासां कन्हे सेरागु  
पुचः पिक्वइ धका धाय्गु ताक तय्गु जक जुइ मखु धका भापे ।  
अले थुकी छ्वाउं त्यला सीत्यंगु नुगःपा नं मुलुका बिइ फुगु बिचाः व  
तर्क, भावना व चेतनां जा थें मेगु क्वा बिइ फइगु पुचः पासा पाखें  
याकनं आस याये; आसां मथ्याइगु लँपुं पिदंम्ह पासां आसां थ्याइ  
हे मखु धका क्वात्तुक छगथः नुगले चिना थ्व थनं तुं पूवके ।  
आयात थुलि ।

—इश्वरानन्द



## स्वर्गया अभियान

छन्हू जितः मेबले स्वया अप्पो स्वर्ग वनेगु इच्छा जुल ।  
 इच्छा थवयात पूर्ति याय्त मनूतय्सं फक्क प्रयत्न याइ, जिक्व त्याग  
 नं । पूर्ति ज्वीमा मज्वीमा इच्छां मनूतय्त मोह याय् फु । धाथेला  
 इच्छां हे मनूतय्त स्वाकातल, मानवता त्याना च्वन, अज्ज विश्व हे  
 नं थौं थुलि न्हिना च्वन । मनूतय् स्वाय्गु इच्छा दया स्वाना च्वन ।  
 नत्र थौं विश्व हे उजाड ज्वी धुंकल ज्वी-यदि जन्म जुक्क मनूतय्  
 स्वाय्गु इच्छा मदुगुसा । छम्ह मनुखं थःगु जीवनय् गुलि गुलि संघर्ष  
 याइ, गुलि गुलि त्याग व तपस्या याइ, मनूतय्सं गुलि गुलि धर्म,  
 पाप व अत्याचार याइ-फुक्क इच्छा यागु हे कारणं मखा । खला  
 इच्छांयात आशां त्यावा बी विश्वासं बः बी । तर इच्छा हे मदुसा  
 आशा विश्वास धापिनि सृष्टि हे ज्वी मखुला शायद । छाय्धासा  
 न्हापा सुं मनुखं छुं बस्तुया इच्छा याइ अलेतिनि वं आशा व  
 विश्वास याइ व बस्तु प्राप्त याये फइ धका । धाय्गुया तात्पर्य  
 इच्छायाके तःधंगु शक्ति दु, ताकत दु-मनूतय्त छुं ज्या याकेगु व  
 मयाकेगु ।

जि नं छम्ह मनू-इच्छाया छगः भकारि । उकि जिके नं छुं  
 बस्तुया निंति, छुं ज्याया निंति इच्छा ज्वीगु स्वाभाविक हे खत ।  
 मनूत सकस्यां थःथगु इच्छा दइ-छुं ज्या याय्गु । तर थौं जिके

गजबगु इच्छा छगू बया चवन-‘स्वर्ग’ वनेगु, । गनकि थौंतक सुं  
मनू थ्यंगु जि मस्युनि, भानवताया इतिहासं मस्युनि, अन्धविश्वासी  
धार्मिक ग्रन्थया खँ मेगु हे । स्वर्ग जि मस्यु, गन ला, गुखे ला, गुलि  
तापा अले अन वने अप्पी लाकि थाक्की । थाक्की व अप्पीया खँला  
तोता हे छ्य, छायाकि गन इच्छा दत अन थाक्की व अप्पीया ला  
प्रश्न हे मन्त । थाक्की धका लिकुना च्वंगुसा थौं सगरमाथाया च्वकाय्  
तेन्जिङ्ग थ्यन खइ मखुनि । तेन्जिङ्ग थःगु हिममत व वलिदानं सगर-  
माथाया च्वकाय् थ्यंकेगु इच्छायात साकारयात, थःगु अभियानयात  
सफल यात । थये हे जिगु इच्छायात नं आशा व विश्वासं त्यवा बिल-  
जिगु अभियान नं सफल ज्वी । तर तेन्जिङ्गयागु अभियान व जिगु  
अभियानय् पा जक मखु यक्को पा । तेन्जिङ्ग स्यू-सगरमाथा गन  
ला, गनं वनेगु, गुखें वनेगु । तर जि मस्यु-स्वर्ग गन ला, गनं वनेगु,  
गुखें वनेगु । जि थुलि हे स्यू-स्वर्ग पृथ्वीया गुगू छगू भाग मखु ।  
स्वर्ग वनेत जिगु तुनि ज्या बी फइ मखु धका नं जि स्यू । हानं  
जिगु अभियानया निति की वैज्ञानिकपिसं गुगुं हे नाडिया सृष्टि  
मयानि । हवाइजहाज दु पृथ्वीं पृथ्वी तक जक थ्यंगु । रकेत पृथ्वीं  
चन्द्रमा तक सिबे मथ्यनि । उकि जिगु न्ह्योने आः छगू समस्या  
वल-छुकी च्वना स्वर्गय् वनेगु ? जिगु इच्छायात आशा व विश्वासं  
तोती थें चवन । तर अयनं इच्छां जितः मतोतू जि नं इच्छा यात  
मतोतानि ।

थ.गु इच्छायात तोता छवय् मालकि जितः न्ह्याबलें दुःख  
जू । शरणया मरण मयाय्गु जिगु तःधंगु सिद्धान्त । तर थौं जिगु  
शरण वोम्ह इच्छामय्जुयात तोत्य माली थें च्वने धुंकल । अले  
जितः दुःख ज्वीगु स्वाभाविक हे जुल । इच्छायात मतोतेगु जिके  
मेगू चारा नं ला मन्त ।

जितः दुःख ज्वीबले न्ह्याबले कल्पनामय्जु बिचाः या वो ।  
समाजं जितः हाकुतिना हइबले जि न्ह्याबले कल्पनामय्जुया शरण्य  
वनेगु । गबले गबले ला जि कल्पनायात हे थःगु समाज भाःपीगु ।  
कल्पनायात थःगु दुःखया मुचं बी धुन । तर कल्पना न्ह्याबले  
जिथाय् शून्य चान्हे जक वइगु । उकिं जि थौं चान्हे तक कल्पना-  
यात प्रतीक्षा याना च्वनेमाल ।

कल्पनां न्ह्याम्हसित न्ह्यागुं थासय् थ्यंका बीफु । कल्पनां  
जितः गुलि गुलि लोकय् चाहीकः यंके धुंकल जितः बांलाक लुमंनि ।  
उकिं जितः विश्वास दु थौं नं कल्पनां जितः स्वर्गं तक थ्यंका बीगु  
कृपा याइ । कल्पनां याना ब्यूगु ज्वाया दस्तुर पुलेमो । घूसया ला  
खं हे दुगु मखुत । उकिं जितः कल्पना तसकं यो । बरोबर वयाथाय्  
वनेगुलि कल्पनाया नं जितः मयो मजू ।

चाम्हय् जुल । शून्य चान्हय् जि कल्पना सःता हया । सुकं  
याउंक हे वल । जि वयात थःगु इच्छा कना बिया—स्वर्गे वनेगु ।  
अले स्वर्गं तक थ्यंका बीगु प्रार्थना याना । अले छु मानि कल्पना-  
मय्जुं जितः थःगु रकेटय् तया स्वर्गं यंकल ।

आः जिगु स्वर्गया अभियान शुरु जुल । जि पृथ्वीं च्वय् तप्यंक  
ब्वया, काल्पनिक रकेटय् च्वना । रकेट थपाय्सकं ब्वात कि स्वर्गया  
लंप्वी च्वंच्वंनि चन्द्रमा व असंख्य नगुतय्सं जितः खं हे मखं ।  
उबले क्वय् पृथ्वीमां लय्लय् तातां चाचा हिला प्याखं हुला च्वंगु  
जि बांलाक खं । पृथ्वीया छद्म सन्तान स्वाम्वाकं स्वर्गं थ्यनीगु  
जुया मखा ज्वी ।

जि स्वर्गं थ्यन । सगरमाथा मखु स्वर्गया अभियानय् हे जि  
सफल जुल, बिजयी जुल ।



कल्पना नाप हे जि स्वर्गय् चाहिला । गबले मगनीगु, गबले  
 ऊवाः मज्जीगु सिमा स्वांमा अन खना । न्ह्याथाय् स्वःसां बसन्तया  
 साम्राज्य ! ठीथाय् पृथ्वी थें अन बसन्तया साम्राज्ये ग्रीष्मं हमला  
 यामबो खनी । अले छु मानि बसन्त राज्यया छह्य छह्य नागरिक  
 मुसुमुसु काकां अमर जुया च्वन । थुकि हे अनया मनूयय्त मोह याना  
 तल, सुखी याना तल । छप्ये नय् मखपि पत्रगित जि अन मखना ।  
 उकि अन जि छगू प्रकारया सुखी जीवन खना । तर इच्छा व अभाव  
 अन नं च्चेच्चे धा । प्रकृति लहिना तःपि जनावरतय्गु जीवननाप  
 अनया जीवन तुलना याय् बहू जू । नय्गु, त्वनेगु व पुनेगु तोता  
 अन च्वंपिनि मेगु धर्म हे मदु कर्म हे मदु ।

पृथ्वी थें राजनीतिया कुटनीति जि अन मखना । तर  
 अपशोच ! द्यो हे अनया निरंकुश तानाणाह खनी । द्योया इच्छा हे  
 अन च्वंपिनि जीवन, द्योया आज्ञा हे अन च्वंपिनि कर्म खनी । अले  
 द्योया आज्ञा उलंघन यापिन्त ब्यूगु कसा लुमकेगु हे नं जि स्वय्  
 पाप थें च्वं । जि नं छह्य पृथ्वीया मनू हे मखा— स्वतन्त्रताया  
 पुत्रारी । जितः अले द्यो धाह्येसिया नीति खना क्षुब्ध जुल । पृथ्वीं  
 स्वर्ग वयागु हे अले जिं ब्यर्थ ताल, नरक वयागु चाल । अले जिं  
 कवय् पृथ्वी तु सरासर लिहां वया ।

जि पृथ्वी थ्यन । अले धाय् मास्ती वल; धया—स्वर्ग स्वयानं  
 स्वर्ग थें च्वं थ्व पृथ्वी । उकिं जितः आ गय्थें मस्यु, सी धुंका नं  
 स्वर्ग वनेगु इच्छा मन्त । अले जिगु अपाय् मछि धंगु 'स्वर्गया  
 अभियान' तुच्छ खन । जितः स्वर्गया अभियानय् विजयी जुया नं  
 बमण्ड मन्त ।



## चुरोटया कुँ

चुरोटया कुँ जि तःको मछि खने धुन । लैय् ज्वीपि छम्ह  
 छम्ह मनूतय् म्हुतुं, मचां निसें कया ल्याय्हु बुढा तकया म्हुतुं  
 पिहाँ वइगु चुरोटया कुँ जि न्ह्याबलें खं । अले चुरोटया कुँ नि  
 न्ह्याह्म पासाया म्हुतुं नं पिहाँ वोगु खं । न्हापा लिपा चुरोटया कुँ  
 नाप जितः छुं वास्ता मदु । न्हापा लिपा चुरोटया कुँ खंसां छुं  
 बिचाः मवो । चुरोटया कुँ उबले जिगु नुगः साले मफु । तर थौं  
 छाया छाया, गय् गय् छम्ह पासाया म्हुतुं पिहाँ वया च्वंगु कुँ जिगु  
 नुगः साला काल, जितः छुं बिचाः याकल । पासाया म्हुतुं  
 चुरोटया कुँ चाक चाक लाना पिहाँ वया च्वन । छगू कथंया  
 कलाया प्रदर्शन । जि दर्शक जुया गथेत तुं क तुं क स्वया च्वना ।  
 तर चुरोटया कुँ क्षण पट्टि पिहाँ वया च्वन, क्षण क्षण पट्टि हानं  
 फसय् तना वना च्वन । धोधी जुया पिहाँ वोगु चुरोटया कुँ उखें  
 थुखें सना गबलें च्वय् वन, गबलें न्ह्या वन, थय्क स्वय्बले चुरोटया  
 कुँ थःगु अस्तित्व मतंकेत सुं नाप ल्वाना च्वं थें च्वं । तर धीधी  
 छ्वातुक पिहाँ वोगु कुँ मृत्यु नापं ल्वा ल्वां सालुसे छ्याल बिछ्याल  
 जुया वन । अले मृत्युं वयात स्याना बिल- छ्याल बिछ्याल जुजुं  
 फसय् तना वन । थुकथं हे चुरोटया कुँया जीवन, न्ह्याना च्वन,  
 दिना च्वन, फुना च्वन क्षण क्षण पट्टि ।

मृतुं पिहाँ वोगु चुरोटया कृं फसय् वाथा वाथा कनासां  
मृत्यु नाप ल्बाना च्वन । जीवन संघर्षशील धका जितः ध्वाथ्वीका  
च्वन । अले मानवेताया बाखं कना च्वन ।

मनू जन्म ज्वी । गनं गनं वया पृथ्वीया छ्हा सन्तान जू वोह  
मनू मचां निसें बुढा तक संघर्षया संघर्ष जक यायां छन्हू सिना  
वनी । बुक्को मनू सीमा । थ्व प्रकृतिया अकाट्य कानून । ख नं  
बुक्को मनू थन सिना हे च्वन । तर सी धुंकूपि सुं हे म्वाना मबो ।  
थ्व नं प्रकृतिया कानून हे ला खः नि ।

प्रकृतिया कानून । थुनियात त्वाथले फुपि थ्व विश्वय् सुं हे दु ।  
लः च्वं क्वय् न्ह्याना हे च्वन । क्वं च्वय् गबलें मन्ह्या । अथेहे मनूत  
नं जन्म जुया सिना वनी । सी धुंकूपि म्वाना वइ मखु । थ्व विश्वय्  
गुलि मनूतय् जन्म ज्वी धुंकल, गुलि मनूतय् मृत्यु नं । तर थौं तक  
सुनानं मस्युनि—मनू गनं वया गन वनि । अन्धविश्वासी धार्मिक ग्रन्थ-  
तय्सं धया च्वंगु दु—मनूयात द्यनं जन्म बी अले मनू सितकि धर्मात्मा  
जूसा स्वर्गय् वनी पापात्मा जूसा नरकय् वनी । तर थ्व विश्वय्  
धर्मात्मा धयापि हे सुं दु ? मनूत फुकसिनं मे, दुगु फैतय्त्त म्वा म्वाकं  
स्याना ला नया च्वंगु दु, हि त्वना च्वंगु दु । बुद्ध स्वयानं शान्त  
जुया प्रकृतिया मुलय् द्यना च्वंपि सिमातय्त्त लाखः पिया दन् दन्  
छ्वय्का च्वंगु दु । लखं लख कीतय्त्त न्हु जर न्हुया स्याना च्वंगु दु ।  
बः भिसा जगत भि धाइपिनिगु संसारय् अले मोह्य हे धर्मात्मा दइ ?  
अय्सा सिक्को मनूत नरक वनीपि ? नरक धयागु हे गन ? स्वर्ग थ्व  
थन धका स्यूपि नं ला सुं मदु । अय्जूसा स्वर्ग धयागु शब्द हे गनं  
पिहाँ वल ? नरक धयागु शब्द हे सुनां पिकाल ? थौं तक सुं मनू  
स्वर्ग वना लिहाँ वोगु जि मस्युनि, मानवेताया इतिहासं मस्युनि ।

अथेहे नरक बना लिहाँ वोगु नं सुनानं मखनि, मस्यूनि । अय्सा मनू सितकि गन वनी ? थ्व खँ सुनानं मस्यू । थुलि हे जक स्यू-मनू सितकि कर्णदिपय्, यंका उना छ्वइ । अले नौ जुया चाय् मिलय्, ज्वी, कुं जुया फसय् । थ्वला मनूया ह्याया जक खँ जुल । कर्णदिपय्, ला मनूया ह्या जक उना छ्वइ । सीह्य मनूया आत्माला उइ न्ह्यो हे गनं तना वने धुंकी । अले धार्थेयाह्य मनू अर्थात् मनूया आत्मा गन वन लय् ? लिसः मदुगु छगू न्ह्यसः । तर चुरोटया कुं चाक चाक लाक पिहाँ बया धया चवन-मनू सितकि स्वर्ग व नरक मखु शून्यय विलीन जुया वनि ।

बुक्व मनूत छन्हु सीमा । सुनानं पनां पने फइ मखु । सीगु हे मनूया धर्म अले सीगु हे मनूया अन्तिम लक्ष्य नं । मनूया उगु धर्म अले मनूया उगु लक्ष मनूया इच्छाय् आधारित मजूसं मनुख व धर्म मानय्, याय् हे मा, उगु लक्षय् थ्यंके हे मा । खला मनूतय् सी मये फु । अज्ज गुम्हेस्यां थ्व पृथ्वी, अले थ्व ब्रम्हाण्डया हे अन्त मजूतले म्वाना चवनेगु नं इच्छा दय्फु । तर इच्छा जक दयां छु याय् यदि व इच्छायात पूर्ति याय्गु ताकत हे बयाके मदुसा ।

जि नं छम्ह मनू-मसिसें मगापि प्राणीत मध्ये छम्ह प्राणी । थः थिति, पासापि अज्ज थ्व विश्व हे तोता छन्हु वने मानि गन गन जि मस्यूगु थासय् सुनानं हे मस्यूगु थासय् । म्हुत्तुं पिहाँ वोगु चुरोटया कुं फत्तुं तना वंथें जि नं छन्हु तना वनीतिनि । उबले जितः न्हय म्हेसिनं न्ह्याथाय्, मासां ल्वीके फइमखु खकेफइ मखु । व तंम्ह तनं जुया वनी । जिगु मृत्युइ थन गुम्हं छ्वइ, गुम्हं न्हिली । तर न्ह्याम्ह न्ह्याक्व हे खाःमां न्ह्याम्ह न्ह्याक्व हे न्ह्यूसं जि छवसः व न्ह्यूसः ताइमखु । न त जिगु सन्देश हे सुनानं ताइ । खला मेमेपि मनूतय् थें जितः नं सीगु इच्छा मदु । न्ह्याबलें न्ह्याबलें थन

म्वानाचवने मास्ति वो । तर छु याय् प्रकृतिया तानाशाही राज्य  
स्वैगुं इच्छायात थाय् मदु । उकिं योतां मयोसां काल वलकि थन  
बुक्व मनू सी हे मा । मसिसें मगापिं मां-वौया सन्तान जूगुलिं जि  
नं छन्हु सी हे मानी । कालं जितः नं छन्हु सातु साला या न्याय् की  
तिनि । जनबहाद्योया रथ तीन धारां साला असं त्वालय्, असनं  
लाय्कू अले लाय्कुलिं लगमय् थय्का रथ-यात्रा क्वचाइ थें जिगु  
जीवन रथ नं मचां ल्याय्म्ह ल्याय्म्हं बुढा थय्नेवं क्वचाइ तिनि ।  
जिगु जीवनया रथ यात्राया नं या न्याइ तिनि । उकि हे ला चुरोटया  
कुं जितः हिस्याना चवंगु-जिगु जीवनया अन्त मृत्यु धका ।

म्हुतुं पिह्वां वोगु चुरोटया कुं फसय् इतः मतः कना तना  
वना चवन । मनूतय् जीवनया अन्त मृत्यु खः धका कानूनी तर्क पेश  
याना चवन । तर अय् नं जितः पत्या मजू जि नं छन्हु सी तिनि धका  
छाय्कि जितः गबले हे सी मयो । सीगु जिगु धर्म खःसां, मानव-  
ताया लेंपु खःसां मसीत जि न्ह्यागु न प्रयत्न याय् ।

छन्हु मनूया नातां मानवताया विकासय् जितः गोरव दु  
अले मानवताया शक्ति व बुद्धिस घमण्ड । पशुत सरह जंगलय् जक  
चाहिला असभ्य जीवन हना चर्चापि मनूत थौं विश्वया सर्वश्रेष्ठ प्राणी  
ज्जी धुंकल, विश्वया मालिक ज्जी धुंकल । विज्ञानया लिधंसां मनुखं  
प्रकृतियात हे थःगु नियन्त्रणय् तय् धुंकल । उकिं धाय्फु छन्हु  
मनुखं मृत्युयात नं थःगु नियन्त्रणय् तय् तिनि । अले छन्हु मनुखं  
कालयात नं छ्याना छ्वइ तिनि । उकिं जितः थन न्ह्याबले म्वाना  
चवने मास्ति वो । छन्हु मनू मंगल ग्रह व चन्द्रलोक जक मखु  
फुक्क ब्रह्माण्डया हे मालिक जूगु स्वयत् । अथे मखुसा मनुखं दय्कूगु  
हाइड्रोजन बम् व आयटम् बम्त तज्याना थ्व विश्वय् पूर्ण शान्ति  
वोगु स्वयत् जि न्ह्याबले न्ह्याबले थन म्वाना चवने मास्ति वो । उकिं  
जि थः मसीत न्ह्यागु नं प्रयत्न याय्, न्ह्याह्य नापं नं त्वाय् । चुरो-

टया कुं म्हुतुं पिहां वयालि तना वना च्वन। अले तने न्ह्यो सुं नाप  
संघर्ष याना च्वन। चुरोटया कुं जि नं छन्हु सी तिनि धका ववात्तु-  
ववाना नं सी न्ह्यो मसीत फक्क संघर्ष याय्गु सत्लाह बिचा च्वन। तर  
अपशोच ! जि थ्व मस्यु कि सु नाप त्वासा जि मृत्युं बचय् ज्वी  
फइ। जि थुलि हे स्यू-ई न्ह्या वं लिसे जिगु मृत्यु नं सतिना वइ।  
उकि ज्वीफु ई मन्ह्यात धाःसा जिगु मृत्यु नं अनतुं च्वं च्वनी। अले  
मृत्युं जितः स्याय् फइ मखु कालं जितः थी फइ मखु। उकि जि थः  
मसीत ई यात हे दिकेगु बिचाः याना।

ई यात दिकेगु बिचारं जि ईयात नाप लाना। अले ई नापला-  
य् जं वयात न्ह्याबलेंया निरिति दीगु प्रार्थना याना जि मृत्युं बचय्  
ज्वीत। जिगु प्रार्थना न्यनेवं त्यानुया च्वंगुलि ला मस्यु, ई तक्क  
दिना बिल। तर गजब। ई जक दीवं चाहिला च्वं ह्य पृथ्वी न दित।  
अले थन सृष्टि दित, मानवताया प्रगति दित, विकाश दित। जि  
मृत्युं बचय् ज्वीगु खँला गन वं गन, ऊन अःखः मृत्युं फुक्क मनूतय्त  
छकलं नुनेगु स्वत। उकि जि काचा काचां वना ई यात हानं न्हापा-  
थें तुं न्ह्याय्गु प्रार्थना याना। ई न्ह्यात, पृथ्वी चाहिला, मानवताया  
सृष्टि न्ह्यात, प्रगति न्ह्यात अले जिगु जीवन-रथ नं न्ह्यात छन्हु मृत्यु  
नापलाय्त। मृत्यु विरुद्ध जिगु संघर्ष असफल जुल। जिगु जीवनया  
अन्त मृत्यु हे जुल। उकि हे ज्वी म्हुतुं पिहां वोगु चुरोटया कुं जितः  
लाय् लाय् बुया च्वन-“छं न्ह्याक्क हे प्रयत्न यासां छ मृत्युया  
शिकारं बचय् ज्वी फइ मखु।” थुलि धयाः थःनं तना वना च्वन।

चुरोटया कुं छु खः ? थय्क स्वय्बले ला छुं नं मखु थें च्वं।  
म्हुतुं पिहां वय् साथं तना वनी। तर वहे चुरोटया कुं गुलि गुलि  
कवितय्त कविता च्वय्गु शक्ति बिचा च्वन, गुलि लेखकतय्त लेख  
च्वय्गु ताकत। मनूतय्सं पित्यासां फुधंसां त्वनीगु चुरोटया कुं ई

न्ह्याम्हेसिनं न्ह्यागु खंसां जि उकी मानवताया न्हाय्कं खना च्वना ।  
 अले जिगु धर्म, कर्तव्य व भविष्यया छगू छगू खँ खना च्वना ।  
 चुरोटया कुँ म्हुतुं पिहाँ वय् वं उखें थुखें सना फसय् तना वनी गुकी  
 जि छह्य मन्थ्या पू वंगु जीवन खना च्वना । चुरोटया कुँ म्हुतुं पिहाँ  
 वय् वं तना वनी । उकिं जि थ्वीका च्वना-बुक्व मन्त छन्हु सी  
 तिनि । उकिं जितः आ गय् थें मस्यु. चुरोटया कुँ खन कि जि नं छन्हु  
 सी तिनि धका लुमना वो । अले थ्व नं लुमना वो, छन्हु सी मासां  
 म्वाय्त संघर्ष याय्गु जिगु धर्म खः ।



## कुमाया घःचा

कुमाया घःचा चाहिला च्वन । अले कुमानं उगु घःचाया शोने चा तया न्हाइपुक निराकार बस्तुयात अनेक आकार बिया च्वन । धंप, ग्वंप, सलिं, भ्यगः आदि नामं थलबलया सृष्टि जुया च्वन । मचाय्क हे अले कुमाया चःतिया फलस्वरूप थलबलया द्वे खात । प्यागु चा आ गना नं छाया धुंकल, स्यत्लागु बस्तु ज्वी धुंकल । चां पिहाँ वइगु अन्न हे नया नं चा छुं मखु धाइपिनि मिखाया न्होने हे चा नं छुं खत । थःगु उगु रचना स्वस्वं कुमा नाना वया च्वंगु चःति हुहुं मफु मफु म्हिल ।

आ ग्वंप, धंप नांयापि थलबलतय् थःगुहे छगू संसार दत । इपिं छगूहे थासय् थःथः जुया उगु संसारय् सुखं च्वं च्वन । तर कुमायाके चःति पिहाँ मवय् धुंकल । वया म्हया छपु छपु क्वे स्पष्ट सी दय् धुंकल । उकिहे ज्वी कुमानं थःगु ब्याक्क रचनात मिया छवत ।

कुमाया उगु धंप, ग्वंपत आ वयागु मखय् धुंकल । थलबलतय् नं थःपि थःगु मखय् धुंकल । इपिं स्वैगुं छे छे ज्यतु ज्यला च्वन । करपिनिगु निंति फुना वना च्वन । इमिगु न्हापायागु संसार शून्य मसान थें फिजांमिजां दना च्वन । याकःचा कुमा ज्याया ज्याला दयानं उगु थासय् लुमदं मिखां त्वलं स्वया च्वन ।



चिप द्वय् सलिया लास व बाकूबिकूत, सागालय् भ्यगःया  
 बाकू अले थाय् थासय् धंप, ग्वंपया बाकूबिकूया प्रदर्शन जुया च्वन ।  
 थः न्ह्योने थःगु रचनाया थथे दुर्दशा खना कुमा पलख त्वलं च्वन ।  
 अले छें वना हानं थलबलया सृष्टि यात । न्हापा थें हे थलबलया द्वे  
 खात । तर वें व थलबलत मिया मछ्व, सुम्क द्वे जक चिना तल  
 बुढाम्ह कुमा वहे द्वे स्वस्वं प्वं प्वा जाय्का च्वन ।

कुमानं दय्कूगु थलबलया द्वे शान्त वातावरणय् मौन जुया च्वं  
 च्वन । कुमा थःगु रचना आ गबलें पवी मफुत भाःपा वहे द्वेयातजक  
 स्वया न्हि बिका च्वन । अले म्वा म्वाकं स्वर्गय् च्वंच्वंम्ह थें व  
 स्वर्गीय सुखया अनुभव याना च्वन ।

श्वयां लिपा गनंगनं अचानक बेतोरं हुररर फय् वल । सुनां  
 छु स्यू व फय्या लक्ष छु, गन । तर चिच्चापागु कयालय् च्वन  
 थःगु रचना स्वस्वं मफु मफु सन्तोषया सासः लहाना च्वंम्ह बुढाम्ह  
 कुमानं श्वीकल- व फय् प्रकृतियागु छगू सन्देश ज्वना वःम्ह जुया  
 च्वन- सृष्टि जुवय् बस्तुया अन्त मजुसे मगा । अले कुमाया स्वर्गीय  
 सुखया साधन जुया च्वंगु थलबलया द्वे ध्वाररर दुना चुंचुं जुल ।

कुमा दाजुया श्व घटना स्वया च्वनाम्ह जि अले थुल - जि नं  
 सृष्टिया छगू अङ्ग, सी तिनिम्ह छम्ह प्राणी । गबलें सी मखु धका  
 प्रण याना च्वनाम्हेमित उगु सन्देश जिगु तुगलय् थुं दिक्क प्रभाव  
 लाइगु स्वाभाविक हे जुल । जीवन छगू वरदान मखसे सरा थें च्वना  
 वल । अले म्वाना च्वनेगु हे नं छन्हु सीत जक थें च्वना वल । तर  
 कुमाया घच्चा चाहिनां च्वन, थलबलया सृष्टि मदिक जुया च्वन ।  
 उकिं जि श्व नं थुल - जि सीवं थन वईपि मेपिति लुखाया खापा  
 चालीगु जुया च्वन । जि फूसां थन मानवता मपवीगु खें थुल । उकिं  
 जितः आ छन्हु सीगु हे जिगु अन्तिम धर्म व कर्तव्य थें च्वन ।



## खवबि

खवबि मिखां पिहाँ वइ । तर धात्थें धाय्गु जूसा खवबि धयागु  
हृदयं पिज्वइ, नुगलं बा वइ । मानव — हृदययात जब चिन्ता, पीडा  
व दुःख थें जागु जःजःगु कःति किन्तु की, उबले उकिया प्रतिक्रिया  
स्वरूप मनूतय् मिखां खवबि पिहाँ वइ । खला मानव हृदय छगू  
अदृश्यगु बस्तु खः, उकियात कीसं मखं । तर व हृदयया परिचय  
कीसं मिखां पिज्वइगु खवबि द्वारा खंके फु, श्वीके फु । छाय्कि खवबि  
मिखाय् वया मनूतय् हृदयया बाखं कनी । मेगु कथं धाय्गु जूसा  
खवबि मनूया बाखं— सफू जुया वया मिखाय् चक्कना चवनी गुगू  
सफू ब्वनेबं तिनि मेमेपिसं वयात म्हसीकी अले वया हृदये गज्यागु घाः  
जुया च्वन बांलाक श्वीकी । खवबि थःथम्हं गबलें हे पिहाँ वइमखु ।  
वयात ला हृदयं पित छवया हइ, नुगलं धित्तु धिना हइ । तू तिम-  
सीकं चिकं पिहाँ वइमखु । अथेहे खवबि नं हृदय नाय्वं तिनि ति  
जुया मिखां वइ । छम्ह मनूयात दुःख, चिन्ता व करुणा थें जापिसं  
हिच्चायकेवं तिनि वया हृदय मी ध्यो नाय् थें नाइ । अले वया  
मिखां खवबि पिहाँ वइ— नागु हृदयया ति जुया । उकिं खवबि  
दुःखया छुमां खः अथवा दु खया इलय् मनूतय् हृदयया प्रतिनिधित्व  
याइम्ह छम्ह दूत । धात्थेंला खवबि मानव नुगलय् बज्रं कया पिज्वगु  
प्रतिध्वनि खः अले मानव हृदयया सजीव चित्र नं । छाय्कि खवबि  
मनूतय् नुगलय् घाः जुया पिहाँ वइगु हि खः ।

दुःख धयागु सुयां मयो । सुखी ज्वी सकस्यां यो । तर दुःख  
 धयागु सुयां मयेवं मवइ मखु । अथेहे सुख नं सुयां येवं मवो । मनू-  
 तय् जीवन हे सुख- दुःखया छगू मेला धाइ । जीवमय् गबलें सुखं  
 वइ, गबलें दुःख । मानवताया सृष्टि जूगु युगं युग दय् धुकल ।  
 आदम व ईभ निसें कया थन पृथ्वी अरबं अरब मनूतय्सं जीवन हना  
 वने धुकल । अले थौं नं थन निगू अरबं मयाक मनूतय्सं जीवन हना  
 च्वंगु दनि । तर गुगुं हे युगया सुं हे इतिहासकारतय्सं थव खँ च्वया  
 वंगु मदु कि सुं मनुखं थव पृथ्वी जन्मकाछी सुखं जीवन हना वंगु  
 दु । धाय्गुया अर्थ, थव पृथ्वी जन्म जुक्व मनूतय्सं ख्वबि हाय्का  
 वगु दु । उकि ख्वबि मानवताया चि खः ।

मनूतय् मिखां ख्वबि गबले तनी ? थव खँया कल्पना सिबे  
 बिचाः याय्गु लँ मदु । खला विश्वय् न्हापा स्वया प्रगति जुया च्वंगु  
 दु, बिकास जुया च्वंगु दु । मनूतय् गुलि गुलि इच्छा साकार ज्वी  
 धुकल, गुलि अभावया पूर्ति ज्वी धुकल । मनूत त्वहँ युगं थौया  
 विज्ञानया युगय् थ्यने धुकल । थौं मनू पपू मदुसां फसय् ब्वय् फु,  
 अन्तरिक्षया यात्रा याय्फु । न्या मखुसां लखय् न्ह्याय् फु । अले  
 मनू धुं थें बमलासां थौं मनुखं हम्ह जक मखु दक्व धुंतय्त स्याय्  
 फु । उकि मनू धुं स्वया बल्ला, फुक्क स्वया बल्ला । अज्ज प्रकृति  
 हे नं थौं मनुखं धार्थे याइम्ह दास ज्वी धुकल । उकि आ मनूत तसकं  
 च्व न्ह्याय् धुकल । छाय्कि मनूतय्के ज्ञान दु, विज्ञान दु, ज्यावः दु,  
 त्वावः दु, शक्ति दु, ताकत दु, फुक फुक हे दु । तर अय् नं थौं तक  
 मनूतय् मिखां ख्वबि दुमसूनि । छाय् ? छाय्कि मनूतय् अभाव  
 छता बस्तुया जक मखु, मनूतय् इच्छा छतां मल्या । हानं मनूतय्  
 न्ह्यागु अभाव पूर्ति जूसां, न्ह्यागु इच्छा साकार जूसां लुमधनेगु  
 बानि दु । अभाव पूर्ति जू लिसे अभावया वृद्धि जुया वइगु, इच्छा

साकार जू लिसे इच्छा अप्पो दया वइगु नं छगू मानवीय गुण खः ।  
 उकि मनूतय् इच्छा, अभावयात व्हग त्वाच्चाय् लः फय् थें गबलें  
 नं जाय् के फइमखु । मनूतय् थ्व प्रवृत्ति प्रकृति बियातःगु छगू सरा  
 धाय् माली । तर थ्वहे प्रवृत्तिया कारणं हानं थौया ब्याक्क उन्नति व  
 प्रगति जुया च्वंगु दु । छुं जुया गुगुं इलय् मनूतय् छुं खँया नं  
 इच्छा मन्त कि अथवा छुं बस्तुया नं अभाव मजुल कि मानवताया  
 प्रगति न्ह्यावनेगु पलेसा लिहाँ वनी । छाय् कि गन इच्छा व अभाव-  
 मन्त अन मनूतय् स न्हून्हूगू बस्तुया आविश्कार याय्गु हे तोता  
 छ्वया बी । तर गन न्हूगु वस्तुया इच्छा दइ, आवश्यक ज्वी अन  
 मनूतय् स न्हून्हूगु वस्तुया आविश्कार यायां वनी । थ्व हे प्रवृत्ति  
 उकि मानवताया निंतिं छगू बरदान थें नं जुया च्वंगु दु । इच्छा व  
 अभावं मनूतय् त गबलें मतोतू थें खबि नं मनूतय् त गबलें हे तोती  
 मखु । छाय् कि थःगु इच्छा, अभाव व आवश्यकता पूर्ति मजुलकि हे  
 मनूतय् त दुःख ज्वी गुकिया फलस्वरूप मनूतय् त मिखां खबि पिहाँ  
 वइ । उकि धाय्—मनूतय् मिखां उबले तक खबि तनि मखुनि  
 गबले तक थन मानवता ल्यना च्वनी ।

खबिया मानवता लिसे बनिष्टसम्बन्ध दु । मानवता मन्त कि  
 खबि दइ मखु, खबि मन्त कि मानवता ल्यनी मखु । खबियात हुया  
 छ्वय्त मनूतय् स फक्क जिव प्रयत्य याइ अर्थात् सुख जक हय्त  
 स्वइ । तर न्ह्याक्क हे सुखी जूसां मनूत सन्तोष ज्वी फइमखु ।  
 छाय् कि मानव प्रकृति हे थथे । जंगलय् जक चाहिला कचिगु ला  
 नयाच्चापि मनूत स्वया थौयापि मनूत न्ह्याक्क हे च्वथ्यंसां इमित सुख  
 मगानि, इमिगु मिखां खबि पिहाँ बया च्वंगु हे दनि । अबले मनूतय्  
 नय्गु, त्वनेगु, व पुनेगु जक इच्छा । उलि मगात, अले थौया सभ्य व  
 बैज्ञानिक समाजय् वल । अय् नं इमिगु इच्छात ल्यनाहे च्वन ।

थुकथं सुख धयागु वस्तुया सीमा हे मदु । उकि खबि नं न्ह्याक्व  
हुइत संसां गबलें हुया छ्वय् फइमखु ।

हानं मनूतय् ब्याक्क इच्छा, अभाव आदि पूति जूसां नं  
पृथ्वी खबि ल्यना च्वनी तिनि । छाय्कि थन बुक्क मनूत सिना  
च्वंगु दु । गुकि याना थन मनूतय्सं थः मां- बौ, मचाखाचा, प्रेमि,  
प्रेमिका नाय्या विछोड सह याय् मालाच्वगु दु । अले खबि हाय्के  
मालाच्वंगु दु । तर हानं छुं जुया सृष्टि जुक्व वस्तुया अन्त ज्वीगु  
प्रथाया पलेसा थन छुं वस्तुया नं अन्त मजुसे सृष्टि जक जुया च्वसां  
मनूतय्त पूर्ण सुख वइमखु अर्थात् थनं खबिया अस्तित्व तनीमखु ।  
छाय्कि थौं सृष्टि जुक्व वस्तुया अन्त जुया च्वनंला, बुक्क मनू  
सिना च्वनंला थन जनसंख्याय् वृद्धि मानवताया निरिति छगू जटील  
समस्या जुया च्वन धासा कन्हे अथे मजुसे सृष्टि जक जुया च्वसां छु  
ज्वीगु ज्वी ? थन मनूत च्वनेत थाय् दइमखु, नय्त नसा दइमखु ।  
अले ? उगु समस्या हल याय्त थन हाइड्रोजन व आय्टम बम्त  
तज्याय्फु । गुकिया कारण मनूतय् मिखां ऊन खबिया वर्षा ज्वी ।  
अज्ज थथे नं ज्वीफु खबि नाप नापं मानवताया नं अन्त जुया वनी ।  
उकि थन मनूतय् मिखां खबि हुइगु छुं नं उपाय मदु । बरू खबि हे  
मानव उन्नतिया कारण जुया सदां ल्यना च्वनी । उकि मानवता  
दतले थन खबिया अस्तित्व दयां च्वनीतिनि, दयां च्वनी तिनि ।



# प्रेम

प्रिय .....

नमस्ते !

छ व जि की ज्वी धुंका नं की निम्ह पोबले नापलाय्गु समाजं  
अनुमति बिया मतःगुलिं थ्व पौ च्वय्गु कष्ट याना च्वना । थ्व पौ  
खुनुं याउंक ब्वनेगु मौका छन्त दय्मा !

छ व जि सूसु ह्लापा गबलें हे म्हमस्यूपि थौं जीवन पासाया  
निंति ब्याहा ज्वी धुंकल । तर ब्याहा ज्वी धुंकानं की निम्हस्या  
दथ्वी गुगु व गज्यागु प्रेम दय्मागु खः व दु लाकि मदु अथवा दत  
लाकि मडुनि व जिं बांलाक मस्यूनि । भाग्यं धाय्ला संयोगं धाय्  
अथवा थथे हे मेगु नं छुं धाय् ब्याहा याय् धुंका छ जितः यल ।  
थ्व खँ जिं म्हुनुं धया च्वनागु मखु, जिगु नुगलं धया च्वना, आत्मां  
धया च्वना । थात्थें जि के प्रेम दु । थुकिया विषये मेकथं वर्णन  
याय्त जिके शब्दत मदु । मेपिनिगु परिभाषा जि मस्यू तर जिगु  
थःगु परिभाषा कथं छ प्रति जिगु गुलि प्रेम दय्मागु खः वयासिकं  
भप्पो जक मछु गाक्कं अप्पो दु थें च्वं । छगू खँ छन्त कने मास्ति  
वो-प्रेमया विषये जि छन्त गुगु खँ धया च्वना उकी म्हया छुं खँ  
दुमथ्या । थन जि निगू आत्माया दथ्वीयागु स्वापूयात हे प्रेम धया  
च्वना । करपिसं छन्त बांला अथवा बांमला धाइबले छ प्रति दया  
च्वंगु जिगु प्रेमय् गबलें नं गुगुं असर प्रतिक्रिया वा धक्का लगय्

मज्जू । छखेला थुकी हे जितः गौरव ता छायाकि छ प्रति जिके शुद्ध  
 प्रेम दु धयागु खँय् जितः न्हाबले घमण्ड जुया च्वं । हानं मेखें छंगु  
 रुप व हिसि आदि बिचाः याना च्वनेबले थ्व खँया गबले कल्पना  
 तक नं याय् मफु कि थन जक मखु मेगु नं गुगुं लोकय् छ स्वया  
 बांलागि मेपि दइ । जि थथे धाय्बले मुं मेगिनिगु नुगलय् धाः  
 मज्जुसा यो । कारण थ्व छके दया च्वंगु जिगु क्वात्तुगु प्रेमया  
 प्रतिक्रिया खः । छायाकि जि स्वे बांलागुया परिभाषा हे योगु खः ।  
 थ्व फुक्क धाय् धुंका नं जिं छके छन्त येय्केगु व मयेय्केगुया न्ह्यसः  
 न्यना च्वना । छायाकि छगू पक्षीय प्रेमयात जि भामपिया । हान  
 छं हे मयोसा जि छन्त येय्का च्वनेगुया नं ला अधिकार मदुनि ।  
 तर जि जिगु प्रेम उबले तक लितकाय् मन्बुनि गबले तक छं जितः  
 मयेय्कल अथवा मयेय्के धुंकल धयागु खँय् विस्वास मवनी ।

आ थन अधिकार व येय्केगु मयेय्केगु खँ वःगुलि जि धाय्-थ्व  
 क्वःछीगु छंगु अधिकार छके हे दु । अले छ जितः येय्केत नत जि  
 थःगु ख्वालय् श्रृंगार याय् नत जि थःगु नैतिक तथा मेगु गुगुं  
 सिद्धान्त, लक्ष आदीयात हे हीका छवय् । जि धाय्हे धुन दुने  
 नुगलं निसें पिज्वःगु प्रेमयात हे जक धात्थेयागु प्रेम धाइ । मनूतय्सं  
 गुलाव स्वांयात येय्कथें खालि यौवन, मादकता आदी बाह्य कारणं  
 जक ज्वीगु प्रेम ता नं ला च्वं च्वनी मखु । खःका प्रेमं लिपा थुमि  
 विषय अप्पो मात्राय् सम्बन्ध दइ । तर अय् नं जिगु धापू ला हृदय  
 हृदयया प्रेम हे सर्वोपरि ज्वीमा । थुगु रुपं ज्वीगु व जूगु प्रेम जक  
 ता च्वने फइ, अज्ज करपिसं जक मखु कीसं हे नं थज्यागु प्रेमयात  
 त्वाथला छवय् फइ मखु ।

की निम्हस्या प्रेम प्रेमि व प्रेमिकाया सम्बन्ध अप्पो निम्ह  
 मनूया सम्बन्ध खः । उकि थुकी मानवीय भावना ओतप्रोत ज्वीगु

अस्वाभाविक मखु । गन तक जिगु सम्बन्ध दु जि ला थ्व हे धाय्—  
जि छत्त थ्वहे भावनाया आधारे प्रेम याना च्वना । 'निम्ह मनूया  
सम्बन्ध, जिगु थ्व बाक्ययात बाँलाक थ्वीक्यगु अनुरोध याना च्वना ।  
जिगु तात्पर्य थ्व कि की निम्हस्या सम्बन्धयात तुच्छ खनेगु अथवा  
केवल की निम्हस्या व्यक्तिगतया गुप्त सम्बन्ध जक भापेगु तःधंगु  
भूल ज्वी अज्ज धाय् तःधंगु अपराध ज्वी । कारण कीगु सम्बन्धं  
पिहाँ वइगु नतिजां अले कीगु सम्बन्धं हे नं गुगुं इलय् कीगु थःगु  
देश, मानवता अले विश्वयात हे नं परोक्ष अथवा अपरोक्ष कथं  
प्रभावित याइ तिनि, असर परे ज्वी तिनि । थुनिया बिषय अप्पो  
ब्याख्या याना च्वनेगु अनुचित भापा अय्न छं थ्व खँयात बाँलाक  
मथूसा जि थुलि धया वी कि की नं छन्हु सृष्टि कर्ता ज्वी तिनि ।  
उकि हे ला जि धया च्वना कीगु हृदय विशाल ज्वीमा संकुचित  
मखु ।

थ्व फुक्क खँयात तोता कीगु हे जक खँ ह्वाय्गु जूसां जि च्वे  
धयार्थे की निम्हस्या जीवन पासाया निति ब्याहा ज्वी धुंकल । उकि  
की निम्हस्या परस्पर क्वात्तुक प्रेम ज्वी धुंकूगु खःसा आ कीपि थौं  
जक मखु कल्ले व कंस नं अर्थात् कीगु जीवन दतले नापं थ्व जीवन  
हना च्वने मागु दु । छं स्यू जीवनय् अनेक समस्यात वइ-गबलें  
गबलें ला थ्व समस्या थपाय्मकं जटील नं ज्वी की की म्वाना  
च्वनेत त नं अनेक प्रयत्नत याय् माली । ज्वीफु समाजं हे नं छकः  
निक. कीत हाकुतिना हइ । थथे हे गबलें गबलें अनेक आर्थिक तथा  
अन्य संकटत नं कीगु ह्योने वइ । हः, थ्व फुक्क समस्या, संकट  
आदीयात की निम्हं जाना निरन्तर दूर याना छ्वय्गु हे कीगु जीवनया  
संयुक्त ज्या ज्वीना । थ्वला जुल दुःख वइबले यागु खँ । आ सुखया  
इलय् नं कीगु प्रयत्न थथेहे ज्वी माली । की निम्ह जाना हवेगु  
सुखी जीवनया बिषये ला छु धाय् थुनिया तुलना स्वर्गया गुगुं नं



सुख नाप याय्गु स्वेगु हिम्मत हे दय् थाक्वी । थुकी सन्देह मदु ।  
 थुकिया निति केवल शुद्ध प्रेमया जरुरत दु । गुगु जि छन्त समर्पण  
 याय् धुंथे च्वं । उकिं जिगु निति ला आ छंगु ब्यबहारया हे जक  
 प्रतीक्षा याय्गु सिने मेगु लँ मस्त । छं पाखें जि थुकिया आशा याय् ।  
 छंगु सम्बन्धाय् वय् धुंगुलि जि विश्वास नं याय् । तर जि गबलें  
 हे थुकिया निति छन्त विवस याय् मखु नत थुकिया निति जि छन्त  
 आग्रह हे याय् । छायकि जि छंगु अधिकार व स्वतन्त्रतायात न्ह्याबलें  
 सम्मानया दृष्टि स्वया च्वना ।

की निम्हस्या दथ्वी ब्याहा ज्वी धुंकल । थ्व हे जक जिं छन्त  
 व छं जितः धाइगु प्रेमया आधार मज्जीमा । अथेसा ब्याहा धयागु  
 छगू प्रेमया दकले सत्तीगु अवस्था खः । तर कीगु ब्याहा धासा प्रेम  
 ज्वी न्ह्यो हे जुल । उकिं हे ला ब्याहा ज्वी धुंका नं कीगु न्ह्योने  
 प्रेमया न्ह्यसः वया च्वंगु । खला थ्व समस्या कीत जक मखु कीगु  
 समाजया मेमेपिं ल्यासे ल्याय्म्ह तय्त नं वो । मेमेपिसं थ्व समस्या-  
 यात गथे समाधान यात उकिया हे जक पृष्ठभूमी कीसं नं छुं कोम-  
 छीमा । छायकि प्रेम धयागु मेगु प्रेम नाप तुलना याय् फइ मखु ।  
 हानं थ्व नं लुमके बहः जू कि प्रेम धयागु याय्गु मखु ज्वीगु खः ।  
 धात्येला जिं छन्त गबलें हे प्रेम याय्गुली अप्पो कुतः मयाना । तर  
 मानो छं जिगु हृदये छं प्रति प्रेम याय्गु या पुमा प्युगु थें जिगु हृदयं  
 छन्त प्रेम यात । जि छन्त महेकुसे धाय् फु कि उकिं आ जिगु हृदय  
 छ पाखें लिचिली मखुत गबले तक कि छं उकियात अस्वीकार  
 मयाइ । जिगु धापू थुलि हे जक खः कि छन्त प्रेम याय्गुया बिषये  
 जिगु हृदय जिगु थगु अधीने मदु । उकिं हे ला जिं धया च्वना जिं  
 छन्त प्रेम यानागु मखु जूगु खः । तर आ जिं छन्त प्रेम ज्वी धुंकूगुलि  
 प्रेम याना च्वना । थ्व खँयात छं नं थ्वीक्यगु प्रयत्न यासा शायद  
 छन्त छगू निष्कर्षय् वय्त अप्वी अर्थात् छंगु हृदये जि प्रति प्रेम दःसा

हे जक छं जितः प्रेम याय् फइ । (छं जितः थुकथं याइगु प्रेम हे जक जि येय्के) । नत्र छं विवस जुया अथवा स्वैगुं दवावे वया जितः प्रेम याय्गुं स्वत अथवा यात धासा थ्व छंगु व जिगु निति जक मखु जि च्वे धयार्थे कीगु देश व मानवतायात नं भि ज्वी मखु । की निम्हस्या सम्बन्धे नं जि तःको मछि देश व मानवताया खं न्हयथने धुन । मनू तयसं धाइ थ्व केवल प्रगतिशील ज्वीगुया निति छगू शब्दजाल जक खः । तर जि थ्व खंयात स्वैगुं नं अवस्थाय् मानय याय् मखु । छाय्की कीसं स्यू छम्ह छम्ह मनू मुना थन देश दया च्वन, मानवता दया च्वन । की निम्ह जक स्यन कि अथवा की निम्हेसिगु अभावे थन कीगु देश व मानवताया अस्तित्व दइ मखु धका जि गबले नं धया मच्वना । जिं ला थुलि हे जक धाय्गु हिम्मत याय् कि की नं मनू, की नं कीगु देशया नागरिक, की नं मानवताया छगू अङ्ग (चाहे न्ह्याक्व हे चीधंगु महत्व कीगु ज्वीमा) अले थ्व नं धाय्फु कि की भविष्य पाखे न्ह्याबना च्वनागु दु । बस् जि थुलि हे जक धाय् । तर थुनिया ब्याख्या याय्त नं जि सुंखना मग्या । गथेकी की निम्ह मनू भविष्य पाखे न्ह्याबना च्वनापि । अले सुनां धाय्फु कि कीगु देश प्रतिया कीगु कर्तव्य व मानवता प्रतिया कीगु धर्म सीमित धका । भविष्यया प्वाथे छु दु छु मदु सुनां धाय्फु ? भविष्यं कीत छु दय्की की सन्तानयात छु दय्की सुनां छु स्यू ? अले देशया निति की निम्ह मनू हे जक धाय्गु व मानवताया निति छुं हे मखु धाय्गु गथे उचित ज्वी ? छह्य मनुखं विश्वयात ख्याय्फु, मानवतायात थिफु धयागु खंया उदाहरण ला इतिहासं न्ह्याह्यसितं कयना च्वंगु दु । हिटलरं विश्वयात मख्याला ? बुद्धं थौं मानवतायात थिया मच्वंला ? थौंला ऊन विज्ञानया चहल पहल दुगु ई । अले छम्ह मनुखं मखुला थन बम् दय्केगुया सिद्धान्त पिकागु ? उकि केवल छह्य अथवा

निहा मनूया सम्बन्ध धका प्रेमया दुरुपयोग मयाय्त जि हानं छन्त  
 अनुरोध याय् । अले दुनुगलं निसें ध्व धाय् कि छं जि नापया  
 प्रेमया विषये न्ह्यागु नं खँ क्वःछी न्ह्यो कीगु देशयात लुमंकी,  
 मानवताया बिचाः याय्गु स्व, विश्वया चिन्ता या । ध्व ला जुल  
 कीगु धर्म व कर्त्तव्य आदिया बिषये छुं खँ । कीपि निम्हेसितं यइ  
 कीगु जीवन सुखी व आनन्दमय ज्वीमा । उकि कीसं ह्यापा  
 थःथःगु कर्त्तव्य नि पू वंके मा । अले तिनि कीसं सुख व आनन्द  
 प्राप्त याय् फइ ।

अन्त्ये वया जि छन्त क्वात्तुक धाय् कि छं प्रति जि न्ह्याक्व हे  
 प्रेम दःसां जिगु निति छ स्वया जिगु देश तःधं । छंगु अनुपस्थिती  
 अथवा छ नापया विछोडय् जिगु नुगः ख्वइ, जि ख्वय् । थुकियात  
 पनेगु अधिकार स्वैकें दय्मा मदय्मा जि ख्वयां तोत्य । तर जिगु देश  
 मदइबले जि ख्वय्गु अधिकार मदइगु जक मखु ख्वय्गु हे अन  
 शायद अपराध जू वनी । उकि देश मन्त कि छंगु जिगु अस्तित्व  
 हे त्यना च्वने फइ मखु । अय् जूगुलि छंगु निति नं जि स्वया  
 छंगु देश तःधनेमा । छंगु निति जि व जिगु नितिं छ जुया  
 म्वाय्गु स्वया छ नं जि नं थःगु देशया नितिं म्वाय्गु भि जक  
 मखु भिके नं मा । की चिक्चाधंगु देशया नागरिक, कीगु देश  
 अपाय्सकं उन्नति नं मजूनि । अले थौंया अणु व परमाणुया युगय्  
 नं की खुकुरि ज्वना स्वतन्त्रताया पिवा च्वं च्वना । थुकिया हे  
 कारणं मेमेगु देशं कीत बमलागु देश भापी । अथेला थौंकन्हे  
 अन्तरराष्ट्रिय जगतय् सह-अस्तित्वया भावनां थाय् काय् धुंकूगु  
 दु । अथेमां बल्ला त्या याय्गु साम्राज्यवादी नीतित नं ह्मना मवनि ।  
 उकि ज्वीफु कीगु देशयात नं गबलें थज्यागु साम्राज्यवादी नीतिया  
 सामना याय् माली । अज्याबले देशया नितिं म्वाना च्वनाम्ह जिं  
 थःगु देशया नितिं अज्ज म्वाय्त संघर्ष याय् माली । उगु इलय्

जितः जिगु देशं चव्य् सुनं मेपिं तःधनी धयागु, खँ गय् लुमना चवने फइ ? जिं थ्व धयागुया मतलब थ्वहे खःकि गुगुं छगू निगू विशेष इलय् छं प्रति जि प्रेम दया नं व खँ लोमने फु, व खँया वास्ता मयाय् फु । थथे हे जुया वनीबले छं जितः छंगू प्रेम प्रति अन्याय यात धाय्गुया अधिकार छन्त बी फइ मखु । जिं नं छके भज्यागु अधिकार पवने मखु ।

हानं जिं छन्त गबलें हे जि स्वया वव्य् तया स्वय्गु हिम्मत जक मखु कल्पना तक नं मयाना । जिं स्वय् छ गुलि ग्यं जि वयां चव्य् ग्यं धाय्गु व जि स्वया छ ग्यं धाय्गु की निम्हेसिकें अधिकार महु । प्रेमया बिषये खँ ह्लाइबले अप्पोस्यां 'निम्हं छम्ह' धयागु, खँ पिकाइ । थुकियात जि नं मानय् याय् । तर जितः ला थथे च्वं निम्हं छम्ह धाय्गु, खँ दःसां छम्ह छम्हया थःथःगु हे अधिकार व स्वतन्त्रता दया चवने मा । थुकिया अभावय् प्रेमया मू हे दइ मखु, अस्तित्व हे तना वनी । निसन्देह बराबरिया आधारय् प्रेम जुसा हे जक अथवा जूया च्वं सा जक व प्रेमया मू च्वंचवनी, अस्तित्व दया च्वनी । प्रेम उकिं घच्चायापुगु खँ मखु । छं नं सीःमा प्रेमया हे आधारय् संसार म्वाना च्वंगु दु ।

आ छता खँ ल्यँ दनि-की प्रेमया पवित्र खिपतं परस्पर आवद्ध ज्वी धुंका नं कीत सुनानं फाया बी तिनि । उकिं न्ह्याक्व हे ह्यासां की नं छन्हू बाय् माली तिनि । कीसं ला धाय् कीत फाय्गु शक्ति स्वैकें नं दय् फइ मखु । तर थ्व खँ शब्दत हे जक जुया ल्यना च्वनी । जिगु संकेत मृत्यु नाप खः । मृत्यु मनूत स्वया थौं तक बलाना च्वंगु दु । उकिं कीसं वयात बुकेगु खँ सती मजूनि । उकिं मृत्यु कीत फाया बी तिनि । तर छ ह्लापा जि नाप बाया वने मालि लाकि जि ह्लापा बाया वने माली कीसं मस्यु । कीत मयेक नं थथे

ज्वीबले छुं याय्गु धयागु खँ ला उबलेयागु परिस्थिति स्वया हे जक ज्वी । अथेसां जितः धाय् मास्ति वो-मदय् धुंकूम्हेसिगु लुमन्ती थःगु ल्यंगु जीवन फुका श्वय्गु स्वया सुं मेम्ह नाप हनेगु उचित जू थें च्वं । अथेला थज्यागु जीवन हनेगु कीगु नितिं लाभदायक ज्वी मखु । छायाकि की नाप हं वइपिनिगु जीवनय् नापं थुकिं बाँमलागु नैतिक अथवा मानसिक प्रभाव लावनी । गुकिं याना वयागु जीवन नापं कष्टदायक जूवनी । न्ह्याथेसां दुःख, निराशा व ख्वबि, फुसुकाःयात जक पाचिना याकःचा च्वं च्वनेगु स्वया हानं स्वैगुं जीवन यात ग्वाहालि बीगु अथवा स्वैगुं ग्वाहालि थःगु ल्यंगु जीवनया नितिं काय्गु जिं स्वे छगू प्रगति थें च्वं । न्ह्यागु ज्वीमा थ्व तापागु खँ यात थन हे तोता आशा याय् कीत अथे गबलें हे मज्वीमा ।

ताहाकय्क अनेक खँ च्वय् धुन । आ छंगु लिसःया प्रतीक्षा नापं पौ ववचाय्के ।

छम्ह .....



## सीगु मत

तिमिला मदुगु चाह्लय् कोठाय् च्वंच्वनागु अचानक बिजुलि मत स्याना हल । सीगु मतं जिगु कोथायात नं खिउँका बिल । धात्थें जिगु तइसे च्वंगु कोथाय् आ खिउँसे च्वन, तसकं हे ख्यूंसे च्वन । जिगु कोथाय् ज्योतिं थाय् त्वतेवं अहो ? अन्धकारं क्वात्त थाय् काल । जिगु मिखा कां थें जुल । जिगु मिखां स्वेवं जिं खनी धका च्वनांला गन खः धका जितः ला जःनं धका खक्य बिया च्वंगु । जः मदय्वं जिगु मिखा त्वलं चाय्का च्वनानं जिं कोथाया छुं हे बस्तुत मखन । जि थःत हे नं मखन । जितः म्हाइपुसे च्वना वल, लागिमिगि चाया अले छकोलं कोथायात तमं धया-‘शून्य’ ।

शून्य ! शून्यया परिभाषा जिं स्यूसां थीं तक जिं शून्ययात मखनानि । छुं हे बस्तुत मदुगु, अँ छुं छुं हे बस्तुत मदुगु थाय्यात शून्य धाइ । व बस्तुत जिगु मिखां खंगु ज्वीमा मज्वीमा, शून्ये छुं नं बस्तुत दइ मखु । अज्ज ला उगु थासय् नुगलं तक नं छुं मखनेमा गुगु थाय्यात जीसं शून्य धाय् । तर व थाय् गन दु ? न्ह्याथें जागु शून्ययात नं शून्य मखु धाय्गु ताकत जिगु नुगःयाके दु । जिगु नुगलं छुं मखंगु, छुं खंके मफइगु थाय् थ्व विश्वे जक मखु ब्रह्माण्डे नं दइ मखु, दइ हे मखु । ब्रह्माण्ड धयागु हे पृथ्वी, मेमेगु ग्रहत व असंख्य नगुतय्, छगू समूह च्वंच्वंगु थाय् खःसा ब्रह्माण्डया दुने

शून्य हे गथे दइ ? धात्थें शून्य धया दुगु हे खःसां शून्य खनीम्ह दतकि ला व थाय् शून्य मखुत । छाय्कि स्वैम्ह मनू दतकि हे व थासं शून्यता चिला वनी अर्थात् अन मनू थःहे व शून्ये दय् धुंकी । न्ह्यागु ज्वीमा, सीगु मतं हःगु अन्धकारं जिगु कोथा खिउंसे चवनेवं जि उकियात शून्य धया बिया ।

धात्थें जिगु कोथा—शून्य । अन छुं छुं हे मदु । जिगु मिखां अन छुं छुं हे मखं । ह्वापा जि खना चवनागु जिगु कोथाया छुं हे बस्तुत जि मखं । जि थःत हे ला मखं अले मेगु छु खनी ? मत सी न्ह्यो प्यंगः अंगलं चाहुला च्वंगु जिगु बःवाकूगु कोथा आ सीमा हे मदुगु थें च्वंगु ब्रह्माण्ड स्वया नं तःकू विशाल थें च्वं । अले जि अनया द्यो थें गपाय्धिकः गपाय्धिकः । तर मत सीगुलि जि छुं हे मखं । अंगले यग्गाना च्वंगु जिगु तस्बीर नं जि मखं । तर जितः लुमं जिगु तस्बीर छपु नकिने यग्गाना अंगले लिधना च्वंगु दु । जि थ्व नं स्यू छन्हु व नकि त्वधुल कि अथवा छन्हु व अंगः दुना बिल कि जिगु तस्बीर वने कुनुवया तज्याइ, भ्वाथः जुया गुइ । अले उकिया अस्तित्व अनं तना वनी । सीगु मतं याना कोथाय् च्वंगु न्हायकं नं जि मखं । गुगु न्हायकने जि बरोबर थःगु ख्वाः स्वे नं । तर मत सीगुलि न्हायकने जि थःगु ख्वाः गोकः गोकः मछितुं क तुं क स्वयानं खके मफु, खं हे मखं । ऊन न्हायकनं जितः हि स्याय्थें याना धया हल—“जः हे मदय्क छं जिके छु खनी ?” धात्थें खः जः मदुगुलि जि न्हायकने छुं हे मखं, थःगु ख्वा नं मखं, न्हायकं हे नं मखं । न्हायकनं खःगु हे धाल जः मदय्कं जिगु मिखां छुं खनी मखु । तर न्हायकं तसकं हे च्वापुकाम्ह खनी, धाल—“... उकि मनू हे जर सकतां मखु, छिपि म्वाय्त्त नं स्वैगुं बः मा, स्वैगुं कृपा मा ।” न्हायकनं धागु थ्व खँ खय्मा मखय्मा, छगू निर्जीव बस्तुखं मनूथें जाम्हेसित थथे क्वहचंके बीगु जिगु निति सहय

मजुल । अले छुं मखंगु मिखां ऊन छुं मखन । न्हाय्कंयात तमं चुं चुं  
 ज्वीक तछ्याना बिया । तज्याज्यां हे हानं न्हाय्कनं तः सलं धया  
 हल-“हः थ्वहे छिमिगु अन्तिम इतिहासया चित्र खः ।” न्हाय्कंया  
 थ्व खं जि छकोलं थ्वीके मफुत । मानवताया इतिहास नं गबलें  
 क्वचाइ धयागु खँय् जितः विश्वास मवं । उकिं हे ज्वी चुं चुं ज्वी  
 धुंका न्हाय्कनं चिसलं धया हल-बम् ? धात्थे खः विश्वे दक्क  
 फुकक बम्त तज्यात कि मानवताया इतिहास पू वनी । जि निर्जीवगु  
 न्हाय्कंयात तंमे तछ्याना बिया । छु थुकिया हे बदलाय् निर्जीवगु  
 बम्तय्सं मानवतायात तछ्याना बीगु ला मखुला ? जितः आ  
 ग्यासेवल । न्हाय्कं तछ्यानागुली पश्चाताप नं जुल । न्हागु थजु  
 मत मच्यागुनि जि जिगु सन्दू नं मखं । तर उकिया दुने थ्व थ्व  
 वसः दु धका जिगु नुगलं खं । गुगु वसः पुनेवं हे तिनि मनूतय्सं  
 जितः सभ्यया तंय् तइगु नं जि खना च्वना । तर ख्यूंगु कोथाय् ?  
 सीगु मत दुगु कोथाय् ? ख्यूंगु कोथाय् सभ्य व असभ्य धयागु  
 शब्दत हे गय् दुहाँ वय् फइ ? जि जितः हे मखं थाय् मेपि सुनां  
 खनी ? नकिनय् यान्तां प्यान्तां खाया च्वंगु लंसुरुवालं धया  
 च्वन-“जि छन्त येइबलेयात मखु मालीबलेयात जक खः ।” धात्थे  
 खः लं मनूतय् फी येयाच्वंगु मखु फी मालाच्वंगु । नय् न्हाला  
 मखु नय्मात्रा नय्माला च्वंगु । थथेहे सी मजिया म्वाना च्वंपि नं  
 जि ख । म्वाय् मफया सिना वंपि नं जिं खना च्वनागु दु । ससार  
 थथे हे ला खःनि । गुम्हेस्यां हाकुगु यो गुम्हेस्यां तुयूगु यो । हाकुगु  
 मयोपि भूयूतय्सं छम्ह अफ्रिकी ल्यासेयात धाइ-ह्यांग्वा थें हाकुसे  
 च्वं । तर वहे ल्यासेयात वेया प्रेमि धाइ-चन्द्रमा थें तलतल थी ।  
 तर जिगु सीगु मत दुगु कोथाय् सु तुयू सु हाकु सु भूयू सु ह्याउँ छुं सी  
 मदु । धात्थे संसार नं थथेहे जुया व्यूसा गुलि ज्यू । थथेहे जूसा निति  
 जाति भेद धयागु घच्चायापुसे च्वंगु वाक्य जक मखु भावना हे नं



तनावनी । अज्ज अफिक्कीतय्य निग्रो व अफिकायात हाकुगु, ख्यूंगु  
 धाइपिं हानं छत्तं च्वे यागु सभ्यताय् थ्यनी । मखुसा सीगु मतय् नं  
 छुं खने दया वइ, हाकुपिसं नं तुयूपिन्त तुयू हे धासां व शब्दया मेगु  
 अर्थ पिहां वइ । अले विश्वे छु मज्जी, सकतां ज्वी । हाकु योपिसं हाकु  
 हे जक हय्त स्वइ, तुयू योपिसं तुयूगु हे जक ।

कोथाय् सीगु मत हे तिन । उकिं तुयूगु सफुती जिं हाकुगु  
 आखः मखं । अले सीगु मतया उपस्थिती जिगु ख्यूंगु कोथा छगु  
 पवित्रगु थाय् थें च्वना वल गन च्वंगु तराजुइ न्ह्यागू लना स्वःसां  
 उलि हे तौल । तर जिगु डांक टिकट संग्रह नं जि मखं । अय्सां  
 जि स्यू व संग्रहलय् सी धुकूपिं जुजुपिनिगु नं टिकट दु म्वानिपिं  
 जुजुपिनिगु टिकट नं दु । तर फुकस्यां थौं तले वहे छगः श्रीपेच जक  
 पुया च्वंगु दु । छगु टिकटय् मदय् धुकूम्ह हिलर कस्सिक  
 धस्वाना उलि हे फुईं पिकया च्वंगु दु गुलि वं थःगु इलय् विश्वयात  
 क्यना वन । अले मेगु छगु टिकटय् गौत्तम बुद्ध नं थ्व बम् व शस्त्र  
 अस्त्रया युगय् नं इकि धिकि तक हे मसंसे शान्त जुया धस्वाना  
 च्वन । थ्व छुं हे दृश्यत जिगु मिखां मखं । तर सीगु मतं जिगु  
 नुगः यात खंके विद्या च्वन-हिलरं लखंलख मनूत स्यासां व बुना  
 वन । बुद्धं मारया प्रहार फफं त्याका वन । ज्योति व अन्धकारे  
 पागु हे छु ? ज्योति मदुगुलिं जिं मिखां मखं तर मत सीगुलि हे जिं  
 सकतां खना च्वना । उकिं न्ह्यागु ख्यै नं पिने जक मखु दुने नं  
 स्वय्मा । अले तिन उकी कीसं धात्थेपागु छुं खनी, उकिया गुण  
 खनी, सुलाच्वंगु रहस्य थ्वी । पिने जक स्वय्बले ला सीगु मतय्  
 कीसं छुं नं खंके फइ मखु । तर वहे सीगु मतय् बाँलाक दुने थ्यंक  
 वना स्वय्बले भूत, भविष्य व वर्तमानया अणु अणु तक नं स्पष्ट खने  
 दया वइ, सी दया वइ ।

सीपिं मनूतय् मिखां खनीमखु धाइ । खः सीपिनि मिखां छुं  
 नं खनी मखु । वया ह्य हे सी धुंका वया मिखां छु जया बी ?  
 न्ह्यायेसां जि स्यू, जि मसीनि । अय् नं जिगु मिखां छुं हे मखं, खंके  
 हे मफु । धात्थे जि सीबले जिं छुं नं खनी मखु । जिगु कोथा जक  
 मखु जिगु देश व जिगु विश्व अले जिगु ब्रह्माण्ड नं जिगु मिखां  
 खनीमखु । जि केवल प्राण जक जुया ल्यना च्वनी । अले संसार  
 जिगु नितिं मतसीगु कोथा थें च्वनी, दुरुस्त थ्वहे छ्यूंगु कोथा थें ।  
 उबले नं जिं जिगु कोथा खनी मखु जिगु ह्य हे नं खनी मखु ।  
 अले संसारं जितः मनू मधासे लास जक धाइ । अले जिं नं संसार-  
 यात शायद छ्यूंगु कोथायात थें शून्य जक धाइगु ज्वी । छाय्की  
 जि संसारे छम्ह हे मनूत खनी मखु,, छखा हे छे खनीमखु अज्ज  
 पृथ्वी रात हे नं जिं खंके फइ मखु । खं हे खंसां जिगु नुगलं हे जक  
 छुं खनी । अले जिं जिगु लासयात उनालि पिहां वःगु कुंयात  
 छगू न्हगु कारखानाया कुं प्वालं पिहां वःगु कुं धका भापीगु खःला  
 अथवा जिगु छे मि नया पिहां वःगु कुं धका च्वनीगु खः, छु खः  
 छु मखु छु खइ छु मखइ थौं हे जिं धाय् मफु । तर थ्व अवश्य खः कि  
 मतसीगु कोथाय् जि गुगु अवस्थाय् च्वंच्वना उगु हे अवस्था  
 अज्यागु हे अवस्था जिगु मृत्युं लिपा नं ज्वी तिनि । जि सीकं हे  
 थनं यक्व मनूत सिना वने धुकल । तर इपिं स्वैगुं हे म्हे थन मदय्  
 धुकल । इमिगु प्राण नं गनं ल्यना च्वन तिनि ज्वी । अले वहे  
 प्राणतय्सं ऊत न थः थःगु नुगलं स्वया च्वन ज्वी । गुंगु प्राणत ला  
 ऊगु लिक्क दुला छुखः छु खः । तर दयां छु याय् ? ऊसं चुपी  
 ल्हना फैयात पाले त्यने बले अथवा छम्ह मनूयात थः शत्रु  
 धका तुपः तप्यंकबले अथवा सुनानं स्वैगुं देशय् हाईड्रोजन बम  
 कुरुके त्यीबले बुद्ध मोहम्मद व क्राईष्टपि वया कीगु ल्हा पं वइ  
 मखुत । स्वर्ग वनेगु लोभं द्वलं द्व मनूतय् नय् मखंसां कोटी होम

यानां च्वातीपिन्त नं आदम व ईभं वया स्वर्गय् भि मभि सीकेत  
 जानोपार्जन याय्गु अधिकार मदु, उकि अन सुख व आनन्द मदु  
 धका कं वइमखुत । तर जिगु कोथाय् सीगु मत दुगुलि जि चुपि  
 मखं । बरु चुपीया पलेसा वहे बुद्ध, क्राईण्ट व मोहम्मद पिनिगु  
 उपदेश व मन्देण जि खना च्वना, अले छी आदम व ईभं ज्ञान  
 व बुद्धिया निति स्वर्गया शासक [ द्यो ] या प्रति साहसपूर्ण विद्रोह  
 याना स्वर्गं पृथ्वी वःगु खं नं थुल । अले पृथ्वीयात तोता स्वर्गया  
 उच्चारण याय्गु नक नं पाप खः धयागु खं नं सिल । थथेहे सीगु  
 मतं जितः जिगु खयूंगु कोथाय् अनेक खंत सीके बिल, खके बिल,  
 श्वीके बिल ।

सीगु मत मच्यानी थें तिमिलायात नं सुपाचं तोपुया तल  
 तिनि । उकि ऊचालं पिने नं खिउंसे च्वं । खयूंगुलि जि तःजागु  
 चिजागु छें मखं । फुक बलचा थें मथया फुक महल थें खना च्वना ।  
 तर जि वांलाक स्यू श्व व्याक्क जितः सीगु मत जक खके बिया  
 च्वंगु । धास्थेना थन भराय् खागु छें दु तःखागु छें दु अले चिखागु  
 व चिकीचाखागु नं । देश फुकमिगुं साजा धाइ । तर देशयागु  
 सम्पति फुकमिगुं मजू । हानं संसार लाखय् विचित्र हं । फलचाय्  
 च्वंम्हेसित तोता देगलय् च्वंम्हेसित जक पुज्यावसेलि संसार  
 विचित्र मजूमा छु ज्वी ? सुयां मस्तय् सं चन्द्रमायात हें जक पापा  
 धका म्हसीका च्वन, सुयां मस्तय् सं पापायात हे न्हुतु न्हुया च्वन ।  
 अले संसारयात विचित्र धाय्गु हे छाय् ? संसारला गथे दय्कल  
 अथेहे बनय् ज्वी । तर सीगु मनयात पक्षपात मयो । उकि वं  
 जितः नं पक्षपातयात खके मब्बू । उकि सीगु मत च्यागु मतया  
 ववय् खने दैगु व्याक्क अवगणया विरुद्ध विकाश, प्रगति व उकिया  
 निति न्हू-न्हूगु क्रान्ति याय् त प्रेरणा बी । अले थ्वं च्यागु मतया

जलय् खने मदुगु व खंके मफइगु सकतां खंकेत मनूतय्गु नुगलय्, मिखा छुनाबी । उकिंला मनूतय्सं अन्धकारे नं छुं खना च्वन, शून्ये नं द्यो खना च्वन ।

सीगु मत, खः थ्व च्यागु मत मखु । तर च्यागु मत स्वया छु खँय् कम ? च्यागु मतं जः बी । सीगु मतं नं ला कीत अन्धकार ब्यूनि । जः न वस्तुत खक बी । अन्धकार ला क्कन् वस्तुया दुने दुने च्वंगु हा क्यना बी । जःया न्ह्यात मनूया म्ह खके फु । तर अन्धकारे ला मनूया नुगः हे खंके फु, प्राण हे ल्वीके फु । सीगु मत च्याइ तिन ह अले अन्धकारयात ख्याना छ्वइ तिन ह । अय्सा च्यागु मत नं ला सा तिन नि, वं नं ला प्रकाशयात ख्याना छ्वय् फुनि । प्रकाशया अर्थ विकास, प्रगति व क्रान्ति खःसा अन्धकार वहे विकास, प्रगति व क्रान्तिया जइ खः । सूर्योया जल नं छगल पृथ्वी छगोल मखः । बागलय् जलं लँ क्यना च्वनीबले अन्धकारं नं ला बागलय् लँ क्यना च्वंगु दुनि ।

थ्व प्रतियोगिता व प्रतिद्वन्द्विया खँ मखु । उकिं मनूतय्सं च्यागु मतया क्वय् जक मखु सीगु मतया क्वय् नं छुं खकेगु कुतः याय्मा । अले मनूतय्सं थःथःके च्वंगु अज्यागु मतत स्याना छ्वय्मा गुगु मत हाकु व तुय्खका बी, मिसा व मिज निथाय् तया बी, पूर्व व पश्चिम निखे स्वका बी । मखु मनूतय् उगु मत स्याय्गु इच्छा मदुसा थुकी सन्देह मदु छन्हु व मत विश्वयातनं छ्वय्की तिन । छ्व छ्व अले धू धू जुया विस्व खिउँसे च्वनीबले व अन्धकारयात सीगु मतं थः नाली मखु ।



# खबरदार !

छन्हु शून्य चान्हय् कोथाय् चवना कल्पना नाप म्हिनु  
म्हिनुं जि रूस, बृटेन व अमेरिकाया छगू संयुक्त बैठकय् थ्यन ।  
बैठकय् स्वम्हसिनं नं विश्वया पूर्ण निःशस्त्रीकरण विषये विस्तृत  
छलफल याना च्वंगु जुया च्वन । उकिं जि व बैठकयात तसकं  
पवित्र अले महान भाषा । छाय्धासा विश्वया मानवता अज्ज  
विश्वया हे भविष्य व स्वंगु राष्ट्रतय्गु सभाया सफलताय् आधा-  
रित जुया च्वंगु दु । उकिं जि व सभाया आदर यासे कोथाया छकू  
कुनय् मौन जुया दना च्वना ताकि व सभाय् जिगु पाखें छुं खलबल  
पिहाँ मवेमा । बैठकय् गरम गरम नक्सां बहस जुया च्वन ।  
स्वम्हसिनं नं निःशस्त्रीकरणया आवश्यकताय् बः बिल । अले  
स्वम्हं निःशस्त्रीकरणया नितिं तयार जुल । तर अपशोच ! स्वम्हं  
निःशस्त्रीकरणया पक्षपाति जुया नं नियन्त्रण निरिक्षण आदि  
उकिया लिउनेयागु विषये तःधंगु मतभेद पिहाँ वःगुलिं सभा  
असफल जुल । मानव मात्रया इच्छा व आशा धू धू जुल । संसार  
निराशाया सुपाचं त्वपुना बिउंसे च्वन । थुकथं मानवताया नितिं  
दकले तःधंगु व ग्यानापुगु समस्या छह्य न्हिसिगु स्वार्थं याना  
समाधान मजुल । उकिं जि नं निराश जुया, सभ्य धापिनिगु असभ्य  
नीति खना क्षुब्ध जुया व बैठकं सरासर लिहाँ वया । लिहाँ ववं हे  
जिं विज्ञान धाह्य मय्जु छह्य नापलात । वं जितः म्ह मस्यूसां जिं  
वयात बाँलाक हे म्हस्यू । विज्ञानयात म्हमस्यूपिं थ्व विश्वे म्ह हे  
जक मनूत दइ । छाय्कि थ्व युगयात हे विज्ञानया नामकरण  
यानालि विज्ञानया युग धाय् धुकूगु दु । मानवताया विकासे

विज्ञानया गुलि देन दु. वला मनूतय्मं प्रशंसा मयासें मगा । मानवताया आधार हे आ विज्ञान धासां पाइ मखुत । तर संसारे न्ह्यागु बस्तुया नं न्ह्याक्व हे गुण दःसां वया दोष नं छुं मात्राय दइ धयागु उक्ति पाखे विज्ञान थें जाम्ह नं अलग चवने मफुत । वयाके नं त.धंगु दोष पिहांवल । छायाधासां विज्ञानं कीगु पवित्र विश्वे हाइड्रोजन बम् व आय्टम् बम् थें जापि चण्डालतय्तनं जन्म बिल । गुमिसं की स्वम्ह प्यम्ह मनूत जक मखु सकल प्राणी बले विश्व हे धू धू याय्फु धका ला की बैज्ञानिकपिसं कने हे धुकल । पत्या मज्जीमागु कारण ला दुगु हे मखुत । छायाधासा नमूनाया रूप्य् इमिसं नागासाकी व हिरोसिमाय् बाँलाक कयना हे बी धुकूगु दु । उकि ज्वीफु मानवताया नास याइम्ह नं भविष्ये विज्ञान हे ज्वी । थ्व विज्ञानया भयंकर दोष खः । गुगु दोष छन्हू वयागु हे गुगत फुक्क छ्वय्का छ्वइ तिनि । थ्व निश्चय खः । न्ह्यागु ज्वीमा विज्ञान थें जाम्ह लिसे जोरि खोजय् याय्गु हिम्मत मवल । उकि जि यात ज्वय् तय् हे माल । अले भचा सतिक थ्यनेवं छ्यों हे लाकामे थी थें च्वंक प्रणाम याना । तर वला साधारणम्ह जुया च्वन । अपाय्मछि धम्हेस्यां जि नाप पासा सरह हे व्यवहार यात । लय् द दं हे जिपि निम्हसिया खँल्हा बल्हा जुल । लंपु मिले जूगुलि ज्वी खँया प्रसङ्गे विज्ञानं जिके न्यन-

“थीया निः शस्त्रीकरण सम्मेलन छु जुल लय् ?”

जि धया-असफल जुल ।

जिगु लिसः न्यनेवं विज्ञानयात नं बिरहं घय्पुल खनी, मिखां खवबि तिकि नंकल । जितः अले क्कन् दुने नुगलय् घाः जुल । छायाकि विज्ञानया व अबस्थां थ्व हे संकेट ब्यू कि मानवताया नास निश्चित ज्वी धुकल । हानं जितः विज्ञान प्रति दाह, इर्ष्या पिहांवल । अले धया थुकियागु श्रेय आखिर छित हे ला दइगु खः नि ।

विज्ञानं गम्भीरं सलं लिसः बिल- “यदि थुकी जिगु दोष दःसा जि लमा पवना च्वना,, । हानं धाल- “ तर थ्व लुक्केगु अनुरोध यानाच्वना कि जिला विज्ञान जक खः बैज्ञानिक ला छिपि हे ।,,

आ जितः विज्ञान प्रति दाह मन्त, इर्ष्या मन्त । छायाकि विश्व नासक बम्त ला कीहे बैज्ञानिक धापिसं दय्कल । अज्जला बैज्ञानिकतय्त्तनं थुकी छुं दोष मदु । कारण बम्त्या प्रयोग याय्गु मयाय्गु खँ राजनैतिक नेतापिनिगु ल्हातय् दु । न्ह्यागु थजु दुगु बम्त ला नष्ट याना मछ्वय्कं अथे सुना वनी मखु । उकि न्हापां बत्त नि नष्ट याना छ्वय माल । तर थथे मांग जक याइपि व नारा बीपि जक दयां छु याय् ? नष्ट याइपिसंहे मयासा । माग व नारातला फसय् ल्ये ल्ये जक पुया च्वनी । फुकसिनं स्यू थ्व विश्वे बम्त बतले मानवताया सुरक्षाया ग्यारेन्टि दइमखु धका । तर सियां छु याय् बम्तय् मालिकतय्के मानवताया छु वास्ता हे मदुसा । फुकसितं थःथःगु स्वार्थया जक वास्तादु । अले छन्हु वहे स्वार्थं विश्व युद्ध नं ज्वीफु, ज्वी : तर हानं छुं जुया विश्व युद्ध जुल धासा विश्व हे धू धू ज्वी थ्व नं इमिसं स्यू । तर अपशोच । सिया नं थःथःगु स्वार्थया निबि विश्वया प्राणीतय्त्त हे नौ याना छ्वय्गुली इमिके भ्या हे दया दुगु मखु । थ्व गज्यागु सभ्यता ? सभ्य धापिसं विश्व संहार याइगु शस्त्र अस्त्र दयकां च्वन । अले मनूतय्गु जीवनस्तर न्ह्याक्व हे थाहाँ वःसां छुयाय्त्त ? गबले तक कि इमित भबिष्यया चिन्ता जुया च्वनी । हानं चन्द्रलोक आदि लोकय् वनेगु नं प्रयत्न याना च्वंगु दु । इमिसं धाल-थुकि मानवताया कल्याण याइ, शान्तियात त्यवा बी, आदि आदि । तर जितला थुकी नं शंका वं । जि स्वे थुकि नं इमिगु हे स्वार्थ जक पूर्ति याइ थें च्वं । चन्द्रलोक वनेगु इमिगु तत्परतां थ्वहे संकेट ब्यू कि थःके च्वंगु

शस्त्र अस्त्र खना इपि हे नं गया । हानं इमिसं थ्व नं मानय्, याय्, धुंकल कि आ आणविक युद्ध जुल धासा बम्तय्, मामालिकत नं ल्यनी मखु । उकि हे ज्वी इपि थपाय्, सकं हथाय्, चाचां चन्द्रलोकय्, बिस्यू वनेगु प्रयत्न याना च्वंगु ।

थुलि बिचाः याय्, धुंका जि हानं छकः कल्पनाया संसारे दुहाँ वना । पिनें स्वय्, ला शान्त, ग्याय्, मागु छुं छुं हे कारण दुथे मच्चं । तर परिस्थिति ला स्हापा स्वया तसकं हे गम्भीर खनी । छाया, थे मस्यु, थौ हाइड्रोजन व बायटम्, बम्तय्, मालिकत हे थर थर खाना च्वन । नेता, बैज्ञानिक व सैनिक अफिसरत धापि फुक्क क्षिमला फमला इरु थिरू जुया च्वन । थुकिया कारण छु खः, जिं थ्वीके मफुत । बिचाः याय्, फक्व याना । तर अहं । देशया सकभनं संकटकालिन स्थितिया बोषना याना तःगु दु । अले फुक्क जनतायात सावधान याना तःगु दु । जि बिचाः याना च्वना । अन्त्ये जि रूसी बैज्ञानिकतय्, गु छगू गुप्त कोथाय्, थ्यन । बैज्ञानिकत फुक्क बिचारे मग्न जुया च्वन । कोथाय्, क्षण अण पट्टि ग्यानापु (Danger) धयागु संकेट प्वाला प्वाला मदिक वया च्वन । व कोथाय्, घौ पलख च्वनेवं जि थुल-इमिसं थः बिश्वास सन्नाइ ज्वी धयागु आशां दय्, कातःगु बम्त फुक्क छुं क्षण लिपा हे अचानक बिष्फोट्, ज्वीगु अवश्यम्भावी ज्वी धुंकल खनी । थ्व खँ सीवं जिगु म्ह थर्र खात अले छकोलं मुच्छां जुल । अथेहे छगू मिनेट्, ति लिपा जि मुच्छां मुक्त जुल । बम्या मालिकत व जि छम्ह त्वःता थ्व भयानक बिष्फोटनया समाचार विश्वे सुं हे मनूतय्, सं मस्यु खनी । उकि बिश्वया मनूतय्, थुकिया समाचार बीगु परम् कर्तव्य जुया नं समयभावं बिबस् जुया ऋण्डै निगू अरब मयाक मनूतय्, मृत्युया न्होने जि सुम्क च्वं च्वने माल । थुकी जितः तसकं दुःख



जुल । ई न्हावं लिसे जितः ऊन ऊन ग्यानावल । छुं लगय् मजुया की द्यो द्यो धार्पिके अनेक प्रार्थना याना, कलः प्याना, बां प्याना, मती वक्व प्याना, प्याय् जिव्क प्याना । तर नां जकया द्योतय् सं छु हे याय फैं ? बम्त बिष्फोट ज्वीत स्वीगू सेकेण्ड ति जक ल्यं दनि । जिला थरथर हे जक खाना च्वना । तर गजब ! कोथाय् च्वंपि बैज्ञानिकत फुक्क काचा काचा कोथां गिहां वन । अले उघरिमय् हे कोथाया न्हाय् कं ऊयालं खन —रूसया मनूत रकेटे ततं च्वे चन्द्रलोके ल्हयया च्वंगु । उखे हानं टेलिभिजने खन—अमेरिकाया मनूत नं रकेटे ततं च्वे गनं ल्हयया च्वंगु । स्वीगू सेकेण्ड छकोलं फुन । बम्त फुक्क बिष्फोट जुल । बिश्व मिं नाल । मनूत व फुक्क जीवात्मात फय् चाय् मिलय् जुल । जि नं अथेहे ज्वी व्रका ग्याना काचां काचां कल्पनाया संसारं पिहां वया ।

कल्पनाया संसारं पिहां वय् धुंका जितः बांलाक हे बिश्वास वन कि बम्तय् मालिकत चन्द्रलोक आदि लोकय् वनेगु प्रयत्न याना च्वंगुया कारण मध्ये छगू कारण इपि थःथःके च्वंगु शस्त्र अस्त्रतय् मारं बचय् ज्वीत नं खय्फु । सृष्टि जूगु बस्तु छन्हु नास ज्वीगु प्रकृतिया नियम खः । उकि बिश्वे सृष्टि ज्वी धुंकागु बम्त नं छन्हु बिष्फोट ज्वी तिनि । उकि गबले तक थ्व बिश्वे बम्त दया-च्वनी उबले तक मानवतायात भयंकर खतरा दयां च्वनी तिनि । गुगु खतरां मनूतय्गु जीवन स्तर न्हाव्व हे थाहां वंसां इमित गबलें हे सुखया सासः ल्हाके बी मखु । उकि जि बिश्वया सकल मानवतय् पाखें बम्तय् मालिकतय्के थ्वहे जबर्जस्त अनुरोध याय् कि इमिसं याकनं हे थःथःगु बम् शस्त्र अस्त्र बिना सर्तं नष्ट याना छव्यमा । मखुसा, मखुसा खबरदार ! कि इपि नं इमिगु बम्तय् मारं बचय् ज्वीत गनं बिस्मू वने दइ मखु ।



## निषा न्हाय्कं

छम्हु जि जिगु कल्पनाया न्हाय्कनय् ब्रम्हाण्डया किचः खना ।  
ब्रम्हाण्डया अनेक ग्रह व तारात मध्ये न्हापां जिगु मिखां पृथ्वी  
खन । तर पृथ्वी विश्व युद्धया नामं मनूत थःथः त्वात्वां थः  
जक मखु पृथ्वीयात हे चुंचुं धूधू याना वन । ब्रम्हाण्डया कण कण  
खने दुगु जिगु न्हाय्कनय् पृथ्वीया गुगुं नं चि खने मन्त । उकिं जि  
विवस जुया थ्वीका-पृथ्वी मानवता तन, ब्रम्हाण्डय् पृथ्वी मन्त ।

चन्द्रलोकया यात्राय् वनाच्चंहा मनू, मङ्गल ग्रह, शुक्र ग्रह  
व ब्रम्हाण्डया अनेक ग्रह ग्रहलय् कब्जा यो वंहा मनू, अरु थ्व  
ब्रम्हाण्डया हे सम्राट् ज्वी त्यंहा मनू दशवीं ले द्वाना अलमलय् जुजुं  
अनहे तना वन, गन गन, थागा हे मदुथाय् ।

खला विशाल ब्रम्हाण्डया न्होने पृथ्वीया आकार तसकं चिधं ।  
थन तक कि ब्रम्हाण्ड छे, पृथ्वी छे तया स्वःसा फीसं पृथ्वीयात  
परमाणुया नं परमाणु धासां गाइमखु । अज्ज ऊन उकिया न्होने  
छह्य मनूया तुलना याय्गु बास्तबिक जक मखु कात्पनिक शक्तिया नं  
पिनेयागु खँ ज्वी । तर वहे मनूया ज्ञान व शक्तिया खँ ल्हाय्बले थ्व

खं अःखः जूवनी । अर्थात् ज्ञान व शक्तिया आधारम् मन् ब्रह्माण्ड स्वया  
 विशाल ज्वी । उकिं ब्रह्माण्डय् पृथ्वीया विशेष थाय् दु. मानवताया  
 दकले तःधंगु मू दु । तर वहे मन् वहे पृथ्वी थ्व ब्रह्माण्डं थःथम्हंतुं  
 न्हावन । मनूया हे ज्ञानं पिह्वावगु बिज्ञानं अले विज्ञानं पितव्यूगु  
 शक्ति मानवताया अन्त जुल । मानव इतिहासया अन्तिम पानाया  
 रूपय् जि थुलि हे खना । लखलख युग न्हापा सृष्टि जूगु मानवतां  
 आदम समाजं सभ्य समाज व बैज्ञानिक युगय् वय्त गुलि ताहाकःगु  
 व कठिन परिश्रम यात व ब्याक्क मनूतय्गु छगू क्षणया भूलं  
 गबलें छुं हे मसइगु चाय् लुप्त जुया वन । थुकिं मानवताया  
 पतन जुल । तने धुकूपि मनूतय्सं थुकी पश्चाताप याय्गु ला  
 खे हे मन्त । तर ब्रह्माण्डय् मानवताया पतनं मनूतय्त थःथःथाय्  
 स्वागत याय्त पिया च्वंपि चन्द्रमा व अनेक ग्रहत नुगः मर्छिका  
 भुगलुं च्वन । अले ब्रह्माण्डय् पृथ्वीया पतनं पृथ्वी वया मन्  
 जू वय्त पिया च्वंपि सकलें नं अन अन हे दुसुना वन । उकिं  
 आ पृथ्वी मानवता मन्त, लिपा नं दह मखुत । छायाकी मानव-  
 ताया श्रोत हे मानवता खः । थुकिं सारा ब्रह्माण्डयात निराश  
 व दुःख ज्वीगु अस्वाभाविक मखु । छायाकि मानवता ग्रह ग्रहलय्  
 सम्बन्ध, ब्रह्माण्डया रहस्योद्घाटन आदि याय्गु आस्वासन ब्रह्मा-  
 ण्डयात गुगु विया तःगु खः व गबलें हे पूर्ति ज्वी मखुत ।  
 थुकथं मानवताया पतनय् सारा ब्रह्माण्ड शोकग्रष्ट ज्वीगु आश्चर्य-  
 या खं मखुत । उकिं हे ज्वी पृथ्वी व मानवताया उपस्थिती ऊः  
 ऊः घायाच्वंगु ब्रह्माण्ड थौं खिउंसे च्वन, वुलुसे च्वन । दन  
 दन च्याना जः बिया च्वंपि असंख्य नगुत नं सित ला मस्यु,  
 ब्रह्माण्डय् अणु अणु खने दुगु जिगु न्हाय्कनय् छुं छुं हे खने  
 मन्त । अँ छुं छुं हे खने मन्त ।

छन्हु जि हानं जिगु कल्पनाया मेगु न्हाय्कनय् ब्रह्माण्डया

किञ्चः खना । न्हापाथे हे जि उकी अशंख्य ग्रह व नगुत मध्ये न्हापां पृथ्वी खना । अले न्हापा थे हे पृथ्वी कुत्या थहाँ वया च्वंगु नं खना । उकि जितः शंका वन शायद आनं बम् पम्हु-यालि पृथ्वी व मानवताया अन्त ज्वी त्यंगुला मखुला । तर न्हाय्कनय् बांलाक सी दया वल व कुं पृथ्वी च्वंगु अनेक कार्खानाया कुं प्वालं पिहाँ वया च्वंगु जुया च्वन । हानं मेगु छगू न्हाइ-पुगु खे ब्रम्हाण्डया कण कण खनेदुगु जिगु न्हाय्कनय् विश्वया धुकुती छगः हे बम्त मखना गुगु कि मानवता व पृथ्वीया निरिति दकले ग्यानापुगु बस्तु जुया च्वंगु खः । मनूतय् तथर खाक्क ख्याना तःगु बम्त थौं समुद्रया ववय् च्वंगु चा नाप मिलय् जुया च्वने धुकल । मानवताया संहार याइगु फुक्क शस्त्र अस्त्रत धू जुया वने धुकल ।

थुकथं मानवतां शान्तिया आवश्यकतायात महसूस यात । विश्वया छम्ह छम्ह मनुखं शान्तियुक्त विश्वे हे जक थःगु स्वार्थ पूति याय् फइगु खे थुइकल । अज्जला खुसि, समुद्र व पर्वत जक मखु पृथ्वीया छगः छगः अणुतय्सं तकं मानवताया विकास, उन्नति व प्रगती फक्क ग्वहालि बीगु प्रण यात । मनूतय्सं नं कन कन थुमिगु गुणत म्हसीका थुमित बांलाक थःगु उन्नति व सुखया निरिति उपयोगे ह्यगु सय्कल । थथेहे राजनैतिक क्षेत्रय् नं न्हापामागु परम्पर अविश्वास, शंका व शत्रुताया भावनात अले धम्की, चेतावनि, आरोप, प्रत्यारोप आदि शब्दतय् पलेसा मित्रता, बन्धुत्व व परस्पर सहयोगया भावना व संजौतां थाय् काल । त्वापु धयागु स्वय्गु ला गन म्येने तकनं मन्त ।

आ पृथ्वी पृथ्वी हे खःसां स्वर्गं थ्वयात पृथ्वी धाइमखुत छाय्कि स्वर्गया गुगुं नं सुखं ध्वय् मफइगु सुखं पृथ्वीं थाय् काय् धुकल । प्रकृति हे नं पृथ्वीयात थःगु रचना धका म्ह-

सीके फइ मखुत । कारण वया गुगुं नं नियमत पृथ्वी लागु मज्जी धुंकल । मरुभूमी गंगु फिसःया पलेसा आ वाउंगु छो मां जाया वय् धुंकल । समुद्रया लः त्वनेत नं ज्या लगय् ज्वी धुंकल, रोगं सुं नं मनूतय्त स्याय् मफय् धुंकल । आ मनूया पतन पृथ्वी गबलें हे ज्वी मखुत । बरु मनू ब्रम्हाण्डया अनेक लोकय् थःगु उपनिवेश स्वनेगुली सफल ज्वी धुंकल । चन्द्रमा व पृथ्वीया दध्वी चुम्बकीय सम्बन्ध जक मखु आत्मीय सम्बन्ध नं दय् धुंकल । मनूतय्सं खनी धका क्वक्वथ्यं सुचुकातःगु अनेक खनिज पदार्थत मनूतय्सं थःगु उपयोगय् हय् धुंकल । थुकथं हे पृथ्वी जक मखु ब्रम्हाण्डया नं गुगु थासय् मानवताया उन्नतिया बाधकया राय् छुं न बस्तुत मदय् धुंकल । उकि हे ज्वी न्हय्कनय् खनेदुगु पृथ्वी ऊऊः धाधां थपाय्सकं थिनावल कि जिगु मिखा जः सिबे न्हाय्कनय् मेगु छुं हे खंके मफुत ।

ध्वहे निपा न्हय्कं थौंया संसारयागु न्ह्योने च्वंच्वंगु दु । मानवताया भविष्यया राय् ध्वहे निपा न्हाय्कं मनूतय्सं खना च्वंगु दु । आ मनूतय्सं थुपि निपातय् छपा येय्के मागु दु । हानं थुपि निगुली छगू ज्वीगु खँ नं अवश्यम्भावी धयाथे ज्वी धुंकल । तःगुमछि विश्वयुद्ध सिधन् धुंकूसां व युद्ध धयागु थौं कन्हे ग्यानापु जक मखु तसकं हे ग्यानापु धयागु खँ स्पष्ट ज्वी धुंकूसां थौं तल्य विश्वे शीत युद्ध जक मखु चिचिधंगु धात्थेयागु युद्ध तक नं छथाय् मखु छथाय् मदिक जुया च्वंगु दु । उकि गुगुं नं इलय् विश्वे आणविक युद्ध ज्वीफु । गुकिया फलस्वरूप न्हापांगु न्हाय्कनं क्यंगु दृश्य साकार ज्वनी । धात्थे अथेहे जुया वंसा वयां लिपायागु खँया ला बिचाः याय्मागु हे मन्त । छाय्कि अन मनूतय् निर्ति सुख, दुख, विकास, प्रगति धयागु ला दइ

हे मखुत । खः का निपागु न्हाय्कनं क्यंगु दृश्य साकार जुया वन धासा सुख, बिकास, व प्रगति हे जक अन दया च्वनी । मनू तय्त् नं थज्यागु हे जक दृश्य स्वय् यइ, अज्यागु हे जक संसारे म्वाय् मास्ति वइ । थ्व खँ असम्भवगु नं ला मखुनि । छाय्कि नियन्त्रित निःशस्त्रीकरण प्रस्तावयात ला सकसिनं स्वीकार याय् धुंकूगु हे दु । आ केवल व प्रस्तावयात कार्यरूप बी मागु दु । थ्व ज्या राजनैतिक नेतापिनिगु खः । बैज्ञानिकतय्सं ला मानवताया भलाइया निति न्हून्हुगु खँ सीका न्हून्हुगु वस्तुया आविष्कार याइ । साहित्यकारतय्सं नं मनूतय्त् थ्व ज्या भि व ज्या भि धका मानवताया रक्षाया निति लँपु हे जक क्यना बी । उकि मानवताया भबिष्य निर्णय याय्गु ज्या थौं नेतापिनिगु ल्हातय् दु । सम्पूर्ण मानव सभ्यता न्हना वं सां मानवता धयागु जइ हे न्हना वनीगु सुयां नं यइ मखु । उकि मानवताया अस्तित्व थ्व ब्रम्हाण्डय् ल्यंका तय्गु मानव इच्छायात साकार याय्गु प्रत्येक देशया प्रत्येक राजनीतिज्ञ तय्गु कर्तव्य खः । थ्व कर्तव्ययात पू वंकेगु थौंयागु दकले तःधंगु समस्या खः । थ्व समस्या समाधान ज्वी फुसा हे निति मानवतां सदांया लागि सन्तोषया सासः ल्हाय् फइ । मखुसा, मखुसा ला खँ हे मन्त निपा न्हाय्कनं मध्ये गुगुं छपा न्हाय्कनं क्यंगु दृश्य साकार ज्वी ।



## कुसि

जितः तिवक मिक कुसिं न्यात । मस्यासां स्या थें चवना वल ।  
तं पिहां वल, अले वहे तमं जि कुसियात पतिचां त्यत्तुत्यला स्याना  
बिया । चिकीचाधिःह्य कुसि सित । जितः फुइं पिहां वल- सुनां  
जितः स्याक्क न्यात वयात जि स्याय् फत । तर कुसि जि स्वया चिधि-  
कःगु जक मखु तसकं हे चीधिकः । न्हापांला जि धया- छपतिचां  
त्यलेवं सी मापिनि जन्म काय्गु हे छाय् ? जन्म कासेलि सुनानं  
स्याका सिना वनेगु हे छाय् ? मसीत त्वाय् फक्के मा । थःत स्याइ  
पिनि पाखें बचय् ज्वी फक्के मा । हानं थः बमला, त्वाय् मफुसा  
जन्म का ज्वीगु हे छाय् ? स्वैतं न्या ज्वीगु हे छाय् ? कुसि चीधिकः  
थ्वहे जक कारण मखु कि जि कुसियात स्याना बिया । वं जितः  
न्यागुलि अज्ज जिगु हि त्वंगुलि हे जि कुसियात छगू सजाय बियागु  
खः । स्याय् हे मागु ला मखु तर कुसियात मेगु सजाय बीगु हे छु दु  
धका । उकिं जि वयात स्याना हे बिया । स्याय्गु पाप खय्फु तर  
मखुगु यापिन्त सजाय बीगु ला छगू न्याअ अथवा धर्म अवश्य नं खः ।  
जि म्वाय्गु मास्ति वो । जि स्यू, न्ह्याक्व हे चीधिकःसां कुसिया नं  
म्वाय्गु इच्छा दइ गुगु इच्छा स्वया नं तःधं ज्वीफु । ख नं कुसि थः  
म्वाय्त् जितः न्यात, जिगु हि भतीजा त्वन । तर थ्वहे भतीचा हि  
त्रंगुया कारणं हे जि कुसियात स्याना बिया । थःगु बेहोसं गनं घाः  
ज्वीबले गुलि गुलि हि जि सितिकं हाय्के नं । उबले जितः जिगु हि  
सिति वंगुली नुगः मस्या नत सुं खना तं हे पिहां वो । तर चिकीचा-

धिकःह्य कुसि जिगु ससिपाय् फुति हि त्वंबले जिगु तं यातय् मलात ।  
अले जिं कुसियात स्याना बिया ।

कुसि सी धुंकल । वं त्वंगु हि नं शायद जाय् धुंकल ज्वी ।  
कुसि जितः घाः ज्वीक न्यागु ला खहे मखु । उकिं जितः स्या नं  
मचाय् धुंकल । तर कुसि म्वाइ मखुत । जिला स्याम् जकं सः  
म्वाके मसः । कुसियात स्याय् न्ह्यो हे नं जि स्यू- कुसियात स्यानां  
जक जिगु स्या लनी मखु, वं त्वंगु हि जाया वइमखु । अय् नं कुसि हे  
मखा, जि मिखा तिसिना स्याना बिया । धून् न्यागु जूसां छगू खं ।  
कुसि न्यागु । अले गन बाकि वयागु चीधंगु अपराधया कारण अले  
वयागु तःधंगु साहसया कारण वयात जि स्यानां त्वोता । घात्यों  
कुसि चीधिकःसां वया साहस तःधं । थःगु जीवनया निंति वं थः  
स्वया लखौलख गुणा तःधिकःह्य जितः मग्यासे न्याय्गु साहस यात ।  
सुं छह्य मनूयाके नं थुलि साहस दय् थाक्वी कि वं थःगु जीवनया  
निंति धुं नाप हतियार मज्जंसे त्वा वनी । उकिं जि थुल- म्वाय्गु  
धयागु इच्छा जि जक मखु कुसिया नं दु । तर स्वैगुं इच्छा नाप  
जितः छु वास्ता ? जितः ला थः म्वाय् दय् वं गा । जि छह्य मनू,  
उकिं जितः थ्व धाय् त मछा मजू कि जि छह्य स्वार्थी । जिगु इच्छा  
पूर्ति ज्वीवं जितः गा । जिगु इच्छा हे जक पूर्ति ज्वीगु जितः यो ।  
हानं जि खिचार्ये छह्य पशु नं ला मखु गुह्यस्यां थःगु म्हय् सलंसः  
कुसितय् लहिना स्वैगुं जीवनया बोळ कोब्यू ज्वी । न्ह्याक्व हे  
चीधिकःसां कुसि न्याइगु घटना छम्ह खिचायात जकं साधारण  
बिषय ज्वी जितःला कुसि न्याइगु घटना छगू तःधंगु उपहास खः ।  
कुसि जितः न्याना हि जक त्वंगु मखु जीवन प्रति जिगु धारणा व प्रेम  
यात नं वं चुनौति बिल । जिगु जीवन जितः यो । जितः जिगु प्राण  
यो । अले थःगु जीवनया अस्तित्वया निंति न्ह्यार्थेजागु संघर्ष व  
परिश्रम याय् त नं जि तयार । अज्जला जि सी धुंका नं थःगु इतिहास



त्वंका थकेत छु याना चवनागु दु । अयनं कुसि जितः हि स्याना  
चवन- जीवन प्रतिया जिगु प्रेम लाखय् वयागु प्रेम स्वया नं ववह्यं  
हं । थार्थे खः छु जुया नय् मखन धासा थःगु जीवनया निति हे  
जूमां जंगलय् वना धुंयागु ला नः वनेत जि ग्या गबले तक जिगु  
ह्लातय् तुपः दइमखु । थये जूमां जि थ्व स्वीकार याय्मखु कि जीवनया  
महत्व बिषये कुसि गुलि थू व स्वया अप्पो जि मथू । कुसि धया  
चवन- सुं नं प्राणी थःगु प्राणया निति गुलि साहस याय्मा । कुसि  
जितः स्यना चवन- म्वाय्त याय्गु संघर्षय् सीत ग्याय् मज्यू ।  
थ्वहे सिद्धान्तयात ज्वना कुसि जितः न्यात, थः म्वाय्त । अयनं  
जितः घमण्ड दु- जि मनू, विश्वया सम्राट् । उकि जिगु निति कुसि  
छुं हे मखु, कुसिया जीवन छुं छुं हे मखु ।

कुसि व जि, जिपि निम्हं प्राणी । प्राणीतय् निति थ्व पृथ्वीया  
सृष्टि जुल । उकि पृथ्वी प्राणी मात्रया हक दु. थः योतले थन चवना  
म्वाय्गु सकस्यां अधिकार दु । प्रकृति बिया तःगु थ्वहे अधिकार  
कथं कुसि जिगु हि त्वन । तर जि वयागु अधिकार प्रयोग याय्गु  
अधिकारया छोने ह्ला तया । छाय्कि जितः प्रकृतिया नियम जिसे  
घृणा दु । गुगु प्रकृतिया बिरुद्ध ल्बाल्बां मानवतां त्याज्नु मचाय्कूनि  
वहे प्रकृतियात थः नाला वःम्ह कुसियात जि जक छाय् बाकि तय् ?  
स्याना हे बिया । मानवतां थ्व पृथ्वी सुं नं मेपि प्राणीतय्गु हक व  
दाबीयात गबले नं स्वीकार याइमखु । पृथ्वी मनूतय्गु खः, सर्गः  
मनूतय्गु खः, व्याक्क सकतां मनूयागु हे । उकि जितः न्याम्ह कुसि  
जक मखु जितः न्याइपि फुक्क प्राणीतय् प्रति जिगु घृणा दु ।  
इमित जि स्याय् मागु दु । थ्वहे जिगु मानव-प्रकृति खः ।

कुसि न्याइगु जितः मयो । लडाईलय् वनेबले गोर्लि कैगु धाः  
स्वया कुसि न्याइगु धाः जितः स्या चाइ । छाय्धासा लडाईलय् जि

षः म्वाय्त सुं नाप ल्वाय् । उकिं अन जिगु दकले तःधंगु स्वार्थं  
 दइ । तर कुसिनापया संघर्षय् जि थः म्वाय्गु व सीगुया प्रश्न मदु ।  
 अथेसां कुसियात म्वाका तय्गुली जितः गुलि बेफाय्दा दु उलिहे  
 वयात स्याना छ्वय्गुली फाय्दा दु । हानं सछि दँ म्वाय् दःसां  
 जीवन चीहाकः धाइम्ह छम्ह मनूयात कुसिया सछि न्हुया जीवन  
 विषये बिचाः याना च्वनेगु फुसंद हे गन ? स्वैगुं अत्याचारया  
 कारण छन्हु सी मानिम्ह जि कुसियात स्याय्गु अत्याचार खः धका  
 बिचाः या ज्वीगु हे छाय् ? जितः उकि कुसि प्रति दया मदु । छम्ह  
 कुसि न्यात कि जिगु छन्हुया आयु पा ज्वीगु खःला अथवा जि छगू  
 क्षण ह्लापा सीगु खः जि छुं मस्यूसां जितः शंका दु । उकि छम्ह  
 कुसियात म्वाकेगुया अर्थ जि थःहे याकनं स्यू वनेगु ज्वी धका जि  
 तसकं ग्या । थुकथं सीगु व म्वाय्गु धयागु जिगु नं समस्या । थ्व  
 समस्या समाधान याय्गु जिगु दकले तःधंगु इच्छा । अले छम्ह  
 मनुखं थःत न्याम्ह कुसियात स्याय्गु अन्याय अथवा छगू साधारण  
 घटना गथे धाय् फइ ? म्वाय्गु इच्छा दुम्ह जिं म्वाय्गु इच्छा दुम्ह  
 कुसियात स्याना । थ्व कुसि प्रति अन्याय अत्याचार सकतां ज्वीफु ।  
 तर जिगु निंतिं ला न्याय, धर्म, सकतां अवश्य खः । जिंला थुलि  
 हे जक इच्छा याय्-कुसित म्वाना च्वनेमा ! तर जितः न्याना मखु,  
 जिगु हि मत्वसे । सुं नं कुसिं जिगु इच्छायात व जिगु निर्देशनयात  
 तेरे मयासे जितः न्या वल धासा जिं इमित स्याना बी ।

खला कुसिया नं ज्यान दु जि नं ज्यान दु । जिपिं निम्हेस्यां  
 सीगु स्वया म्वाय्गु तसकं यो । अय् नं कुसिया म्वाय्गु इच्छा  
 साकार मजुल छाय्कि वया म्वाय्गु साधन हे जिगु ह्लातय्  
 लात । कुसिं थः म्वाय्त दः न्याय्वं हे जिं वयात स्याना बिया ।  
 थुकथं कुसियात स्याना जिं छगू कथंया पाप याना । छम्ह चिकिचा-  
 धिकःम्ह प्राणीयात वया चिकिचाधंगु दोषया निंति निर्मम प्रहार

यांना । थुकिया निंतिं जि अवश्य नं दोषी, अपराधि । अय् नं जितः  
 सजायँ बीपिं सुं महु । कुसिं हे नं जिं स्यानाबले अय्या तक  
 मधा । जिगु अपराध, दोष जिगु न्ह्योने च्वं मवो । अले जिं जक  
 छाय् थःथम्हंतुं थःगु अपराध स्वीकार या ज्वी ? धा थेंला कुसियात  
 स्याय्गु निंतिं लज्याया विषय ज्वी मागु । छाय्कि स्याय्गु हे जक  
 खें जूसा थौं मनूतय्सं पृथ्वी च्वंपिं दक्क फुक्क प्राणीतय्त नं स्याय्  
 फु, कुसियात जक मखु । अय् नं छाय् छाय् जितः घमण्ड हे जक  
 जुयाच्चन- जिगु हि त्वंमह कुसियात जिं स्याय् फत । थुकियात  
 त्वःता जिके मेगु नं घमण्ड दु कि जि मनू, जि सभ्य, जिके बुद्धि दु,  
 ज्ञान दु, शक्ति दु, ताकत दु । तर जिं थःगु तःधंपना व सभ्यता छम्ह  
 कुसियात स्याना कयं जुया । थःगु बुद्धि व ज्ञान अले शक्ति व ताकतया  
 चमत्कार म्बानाच्चवंह कुसियात स्याना कयना च्वना, सी तय्महेसित  
 म्वाका मखु । न्ह्यागु ज्वीमा कुसिं न्यागु घटना जिगु निंतिं त.धं ।  
 छाय्कि कुसिं जिगु हत्या याय्गु असफल प्रयास यात । व कुसि,  
 गुम्हस्यां जितः न्यात, कुसि मखसे धुं जूगु जूसा जि सी नं धुं कल ज्वी ।  
 उकिं कुसि हत्यारा खः । अले हत्यांरायात थ्वहे छगू जक सजायँ दु कि  
 मृत्यु दण्ड । उकिं कानूनि दृष्टिं नं जिं कुसियात यानागु प्रहार  
 अनुचित मजू । हानं कुसि स्वया नं निर्दोषीपिं फै, दुगु आदियात  
 द्योया न्ह्योने तया बलिया नामं स्याय्गु धर्म खःसा छम्ह अपराधि  
 कुसियात स्याय्गु जिगु निंतिं पाप गथे ज्वी फइ ? छम्ह अपराधि-  
 यात क्षमा नं पर्वसा हे जक बी फइ, मपवंकं गथे बीगु, छाय् ब्यू  
 ज्वीगु ? स्यानाबले ला अय्या धयागु क्वमालि भाव प्रकट मयाम्ह  
 कुसिं क्षमा पवनीगु ला सम्भव हे मखुत । हानं जितः न्याना म्वाय्गु  
 धयागु जन्मसिद्ध अधिकार जूगुलि वला जि स्वया त.धं धाइम्ह हे  
 जुल नि । अले जिं जक छाय् थःगु शक्तिया प्रयोग मयाय् ? जिं  
 मुक्क थःगु हे जक तर्कया आधारे क्वःछिना- कुसि दोषी खः ।

थुकिया विषये कुसि लिसे अथवा सुं नं मेपिं पशुत लिसे वाद-विवाद  
याय्त् जितयार मदु । छायाक् थथे याय्गु जिगु खानदानयात  
मल्वो । कुसियात स्याय्गु हे जक जितः ल्वो । कारण मानवतां  
पशु व कीत लिसे थ्व पृथ्वी इमिगु अस्तित्वया विषये छलफल द्वारा  
सम्झौता याइमखु । उकिं कुसियात स्याय्गु पाप हे खःसां जितः  
धर्म व पाप लिसे वास्ता मदु । जित.ला जिगु खानदानया इज्जत व  
स्वार्थ लिसे जक वास्ता दु । छायाकि सी धुंका जि गन थ्यन जिगु  
नितिं वहे स्वर्ग ।

कुसि, थ्व नं छम्ह जीवात्मा खसां तसकं चीधिकः विशेष याना  
छम्ह मनूमा न्ह्योने । उकिं कुसि व मनूया ल्वापुइ कुसि गबलें हे  
त्याइ मखु । छायाक् कुसिं प्रकृतियाके कयाःतगु बरदान हे थज्यागु ।  
हानं जितः नय्त् मामु माक्व खाद्यपदार्थ प्रकृतिं न्ह्यचीका तःगु  
दु । तर बिचरा कुसिया न्ह्योने छुं मदु । उकिं व जन्म ज्वीसाथं हे  
वयात सी मालीगु परिस्थितिं कय्च्या वय् धुंकी । वं म्वाय्गु  
प्रयत्न यात कि हे व सी धुंकी । थ्व कुसितय्गु करुण कथा खः ।  
तर थुकी जिगु छु दोष ? थ्वला प्रकृतिया पक्षपात जकं खः । थुकी  
जितः छुकिया चासो ? जि थः म्वाय् खना च्वंगु हे दु । जितः  
थुलि दग्ं गा । जिगु थ्वहे स्वभाव व प्रवृत्तिया कारण जि व  
कुसिया दथ्वी ल्वापु दया च्वन । अले थ्वहे ल्वापुया सिलसिलाय्  
कुसिं थः म्वाय्त् जितः न्याना स्याय्गु प्रयत्न यात । जि नं कुसियात  
स्याना थः म्वाना च्वना । छायाक् जि कुसि खना मग्ना, कुसि नं जि  
खना मग्ना । उकिं जिगु नितिं कुसि कुसि हे खःसां कुसिया नितिं  
नं जि कुसि हे । अज्ज नं धया च्वना- जिगु नितिं ला कुसि छुं छुं हे  
मखु । थ्व जिगु घमण्डपूर्ण भावना खः । तर वहे कुसिं जि थें जाम्ह  
शक्तिशालि मनूयात हे थःगु आहारया रूपे स्वया वन, स्वया च्वन ।  
उकिं जिं धाय् मास्ति मवय्कं नं धया च्वना- धन्य ! कुसि ।



## जितः न्हूगु यो

जितः न्हूगु यो । थुकिया अर्थ थ्व मखु कि जितः देग स्वया अफ्रिकाया गुगुं छगू न्हूगु देश यो । थुकिया अर्थ थ्व नं मखु कि जितः थ्व पृथ्वी स्वया चन्द्रलोक व मेगु गुगुं लोक अथवा स्वर्ग यो । जितः सा छम्ह मिसा पुलां जूसां न्हम्ह मचा बुझीम्ह मां यो । अथेहे न्हम्ह मचाया बौ ज्वीम्ह न्हम्ह बौ यो । अले जिमि मां बौपि थ हे पुलां ज्वी धुकूसा जिगु नितिं न्ह्याबलें न्हू कारण इमिसं जितः न्ह्याबलें न्हून्हूगु प्रेरणा व शिक्षा बिया च्वंगु दु । पुलांगु इतिहासं ब्यूगु शिक्षायात ग्रहण याना हे तिनि न्हूगु इतिहासया सृष्टि ज्वी । उकिं पुलांगु लिं नं न्हूगु या पुसा पी फःसा व पुलांगु हे नं न्हूगु खः । उकिं जितः न्हूगु यो ।

न्हूगु व नःलिगु धयागु बस्तु जक मखु शब्द तक नं मनूतय् यो । न्हूगु दँ छम्ह पुलां जुया वनी तिनीगु जक मखु थ्वं मनूतय्गु जीवनयात नं चीहाकः याना थकी, पुलां याना थकी । न्हूगु दँ हे छहा मचायात ल्याय्हा याना थकी, छम्ह ल्याय्म्ह यात बुढा याना थकी । अले छम्ह बुढा अथवा बुढियात कालया म्हुतुइ स्वथना थकी । थुकथं स्वयं बले न्हू दँ मनूतय् शत्रु खः । अय् नं मनूतय् न्हूगु दँ यो, न्हूगु दँ वइगु न्ह्याबलें यो । थुकिया कारण थ्व खइ मखु कि मनूतय् याकनं सी मास्ति वः । न्हूगु दँ वइगु दिन न्ह्याइपु मनूतय् नितिं थ्व छगू नखः हे जुया च्वंगु दु । अले न्हू दँ खुनु याइगु म्ह पुजाया अर्थ थ्व नं खय्फु कि न्हूगु दँ बीगु न्हूगु

प्रेरणायात ग्रहण याय्, फक्केत मनूतय्, आत्मायात म्हं नं ग्वाहालि  
 बी फय्ना । अथवा धथे नं ज्वीफु कि न्हूगु दें वया पुलां ज्वीगु म्हयात  
 पुज्याना न्हू दय्केगु । न्हू दें यात थुकथं स्वागत याइम्ह छम्ह मनूयात  
 कालनाप छु वास्ता, नत मृत्युयात हे वं मानय् याइ । जन्म व मरण हे  
 जक जीवनया नां मख् नत स्वर्ग व नरकया लोभ हे जीवनया  
 उद्देश्य खः । न्हूगु योगुलिं मनून संसारे जन्म का वल । सीगु व  
 म्वाय्गु धयागु जीवनया समस्या ज्वी फु । तर मनूत धयापिं सीत  
 हे जक पिया च्वपिं मखु नत म्वाय्त् हे जक वं न्हागुं याइ ।

जिगु जीवन जिगु खः । थुकी स्वैगु अधिकार मदु, अले  
 स्वैगु नियन्त्रणयात नं जिं स्वीकार याय् मखु । जितः न्हूगु यो ।  
 उकिं धकिं दुने च्वंगु संसार स्वय् मास्ति वल । उकिं जिं थन जन्म  
 कया । जन्म कासां निसें जिं न्हूगु हे जक येय्का वया च्वनागु दु ।  
 नत्र सकस्यां लोवंका च्वनीगु सुखमय ह्याउंमचाया जीवनयात जिं  
 छाय् तोता वय् ? मांयागु मुलय् जक व लासाय् जक ग्वारातुला  
 हनेमागु उगु जीवन न्हाक्व हे सुखमय जूसां जिगु निंतिं पुलां जुल ।  
 थुलिं अप्पो ख्व जक ख्वया अले मां-बौयात पिरे जक याना थःगु  
 इच्छात पूति याय् थाकुया वल अथवा मां-बौ प्रतियागु जिगु धर्म  
 व कर्तव्य थुया वःगुलि अज्जला उगु अवस्था पुलां जूगुलिं हे जिं  
 ह्याउंमचा व मचा अवस्था यात तोता थौ या ल्याय्म्ह जीवन हं  
 वया । थौ या जिगु जीवन न्हाक्व हे कष्टदायक व संघर्षमयी जूसां  
 जिगु निंतिं सुखदायक जू छाय्कि थःगु कर्तव्य पूर्वके फत कि हे ला  
 मनूतय्त् सुख ज्वी । थ्वयां अप्पो थ्व जिगु न्हूगु जीवन खः । उकिं  
 थौं जितः थ्व हे जीवन यो ।

थौं जि ल्याय्म्ह, उकिं खःला, छुकि खः, जिं मस्यु, मानवताया  
 सृष्टिं लिपा तिनि प्रतिपादित जूगु ब्रम्हचर्यया सिद्धान्त नं जितः  
 पुलां जुल । अले छम्ह मनूया नातां पू वंके मागु थःगु धर्म व

कर्तव्यया कारण जिं ब्याहा याना । थुकथं हे जिं मद्दिक न्हूगुयात  
हे जक येय्का वया च्वनागु दु । तर क्या गजब ! न्हूगु यात येय्कु  
येय्कु जिं थहे पुलां जुया वनी अर्थात् जिं बुढा जुया वनी । धात्थे  
जीवन धयागु गजबगु खः । सुनां सुनां थःगु जीवनयात न्ह्याकल  
वं वं थःगु जीवनयात दिका वनेमा । हानं थज्यागु हे छन्हु मद्दिकुसे  
मगागु जीवन न्ह्याकेत मनूतय्सं गज्या गज्यागु कष्ट सहयाना  
च्वन । उकिं थ्वीकेगु प्रयत्न याय् माल जीवन छुक्रिया नितिं ?  
जिगु जीवन जिगु नितिं हे जक खःला ? तर थ्व प्रश्न जिं जिके  
मन्यसे सकसिके न्यना च्वने मागु छाया ? जिं स्यू जिगु जीवन नितिं  
जक धालकि जितः स्वार्थी धाइ, मनू धाइ मखु । अय्सा जिगु जीवन  
सुया नितिं ? जिमि मां-बौ अथवा जिमि जहानया नितिं ला ? थ्व  
बिचार हे संकुचित ज्वी धुंकल । जिगु जीवन जिगु नितिं जूसाला  
सीत म्वाय् न जि स्वतन्त्र ज्वी मागू । तर न्ह्याथे जागु दुःख वःसां  
जि थःथःम्हंतुं सीगु अधिकार जिके मदु । उकिं आधुनिक सभ्यतां  
धया च्वनकि जिगु जीवन जिगु जक निति मखु देश व विश्वया  
नितिं खः । अय्सा संसारं जितः म्वाका तय्मा, जि संसारया  
निति म्वाना च्वनेमा । तर जि बुढा जुल कि संसारं जितः तोता  
छ्वइ जिं संसारयात तोता वनी ।

जि मनू जूगुलिं जि बुढा ज्वी तिति । जितः न्हूगु योगुलिं जि  
बुढा ज्वी तिति । बुढा जीवन मानव जीवनया दकले च्वेयागु  
अवस्था खः । थ्वेयां च्वेयागु अवस्थाय् मनू थ्यने हे फइ मखु ।  
थथेहे जि नं बुढा छन्हु ज्वी । जितः न्ह्याबले न्हूगु योगुलिं उबले  
नं न्हूगु यातहे येय्के । जितः न्हूगु हे अवस्थाय् हानं वनेगु इच्छा  
ज्वी । थथे बुजुं छन्हु जि सी । अले मृत्यु धाम्ह बया थःगु विजयया  
घोषणा याइ । कालं नं थःगु ज्या पू वन धका घमण्ड याइ । तर  
जि थ्व मानय् याय् मखु कि जितः काल व मृत्यु स्याना बिल ।  
जिला न्हूगु येय्कु येय्कु छपला न्ह्याज्याय्गु जक खः ।



निबन्धकारया रूपे पद्मरत्न तुलाधरजुया भविष्य आपालं थी  
 धैगु पुष्टि 'बुलुमि' याः । भाषा यइपुसे च्वं, शैली न्ह्याइपुसे व सरल  
 जू । निगित खंयात तःधंकाः मू बीगु कुनः बांलाः । लेखकया परिश्रम  
 सदां सुवाः जुयाः संलग्नताया फल संचवन धाःसा निर्माण व खोजया  
 लँपुइ छह्य मेह्य निबन्धकार प्राप्त जुल धका अऊ अप्पो लुधके फइ ।

**कृष्णचन्द्रसिंह प्रधान**

**पद्मरत्न,**

छंगु निबन्ध जि स्वंगु मखु, निबन्धं हे जितः स्वकूगु । त्हागांगु  
 पलाः नं थुलि धिसिलाःगुलि जिला नुगः हे मुल छ खनाः ।

फिसः थें गंगु विषय ज्वनाः कागति थें रत पिकयाः क्यनेकूगु  
 छंगु प्रतिभाय् कीगु साहित्य-क्यब बाऊः मजुइगु छुमां दु । मोपिसं  
 निबन्धकार जक धासां जिगु मिश्याय् छ कवि नं खः ।

छंगु 'बुलुमि' गुनुहुं न्वयाः छन्त व्वेहेगु स्वयत्त पिया च्वने ।

**दुर्गा**